


ANG PAGPAMATUOD SA IYANG PULONG

 Iduko nato ang atong mga ulo sa makadiyut. Minahal nga Langitnong Amahan, mapasalamaton kami nga ania kami dinhi karong gabhiona. Kami, mapasalamaton kami nga hingsayran namo nga ang Imong Presensiya ania uban kanamo. Karon ginaampo namo nga tabangan Mo ang matag usa kanamo, sumala sa among panginahanglanon. Ginapangamuyo namo kini sa Ngalan ni Jesus. Amen. (Makapanglingkod na kamo.)

² Maayo gayud nga nagaandar na kining mga mikropono karon. Pasayloa ko nga medyo naguba ko kini kagahapon, tungod sa Mensahe nga gusto kaayo nako nga makuha gyud ninyo.

³ Ug gusto gyud nakong masigurado nga nasabtan ninyo kini. Kini mao ang—ang angkla nga aduna kita. Wala kita nakaangkla sa usa ka iglesia. Nakaangkla kita diha kang Cristo, nakita n'yo. Siya lamang kanang bugtong Dalan. Siya lamang ang bugtong dapit sa kasiguradohan, ang bugtong dapit diin gipahimutang sa Dios ang Iyang Ngalan. Ug miingon ang Dios nga tagboon Niya lang ang mga tawo sa dapit nga Iyang gipili nga pahimutangan Niya sa Iyang Ngalan; dili sa bisan unsa nga ganghaan, kondili sa ganghaan nga Iyang gipili. Ug diha niana nga dapit Iyang pagatagboon ang mga tawo, ug dinha lang gyud. Ug hingsayran nato nga wala gayud gipahimutang sa Dios ang Iyang Ngalan sa bisan asa lang kondili diha gayud sa Iyang Anak, nga si Jesus Cristo, ingon nga ginadala kanunay sa anak ang ngalan sa iyang amahan.

⁴ Ug karon moingon mo, “Bueno, unsaon man pag-aplikar niana sa karon? Nga ang matag usa nagaingon man, ‘Anaa ako kang Jesus.’”

⁵ Siya mao ang Pulong. Tungod, “Sa sinugdan mao na ang Pulong, ug ang Pulong kauban sa Dios, ug ang Dios mao ang Pulong. Ang Pulong nahimong unod ug nagpuyo ipon kanato.” Usab, nahisulat pud kini sa Pinadayag sa ika-19 nga kapitulo, pagmakita na nato Siya nga moabot, ang Pangasaw-onon ug Pamanhonon, ang Iyang bisti nga gikatuslob sa Dugo, “Ang Iyang Ngalan gitawag ‘Ang Pulong sa Dios.’” Siya mao ang Pulong sa Dios.

⁶ Ug, mao kana, Siya ang gahum nga nagahatag og kinabuhi. Siya ang Balaang Espiritu nga mao'y, ang—ang dinamika nga nagasulod sa mekanika, ang mga Pulong, nga nagapabuhi Niini. Ug kining tanan kinahanglan nga masigtabang nga

magapamuhat, o dili gayud kini magpulos. Kinahanglan niining dawaton ang tibuok Biblia, ang tibuok nga Cristo, ang bug-os nga Ebanghelyo.

⁷ Gusto kong mosulti, niining pundok sa mga ministro nga akong nakita sa telebisyon kagabii, kabalo na ko nga ipasibya kadto, ug mao nga mitan-aw ko niadto. Gusto kong dayegon kini nga mga kaigsoonan, kadtong mga atua niadtong pundok sa mga ministro, pagkahawud gayud nga mitubag sa mga pangutana! Ug usa gayud ako ka kritiko, kabalo mo, bisan pa niana, pero wala gyud ko'y unsa man nga masaway niadto. Tinuod gayud kadto, ug uyon ako niadto, sinto porsyento. [Nagapalampak ang kongregasyon—Ed.] Salamat. Amen. Direkta sa punto ang maong mga tubag. Nagustohan ko kadto. Aduna lang unta ko og usa ka pagpasalida aron mapatan-aw pud nako sa akong iglesia didto sa among lugar. Pagkaanindot kadto.

⁸ Ug mapasalamaton kaayo kong masayran nga—nga ang Dios nagapakighilambigit usab sa ubang mga natad sa pagpang-misyon, gawas sa atoa mismong grupo sa Pentecostal, ug nagapatungha og mga kalalaken-an, kanang binhi sa Dios, nga dugay nang naipugas niining mga tuiga, nagahulat lang para sa Kahayag nga maidan-ag kanila.

⁹ Ug nagahatag usab kini kanato og usa ka pasidaan, mga higala, nga mahibaloan nga si Jesus miingon, “Sa diha nga nagapangabot na kining nagakatulog nga mga dalagang ulay aron mopalit og Lana, mao kana usab ang higayon nga miabot ang Pamanhonon.” Busa atong makita sumala niana, nga pagmakita na nato ang mga Episcopalian, Presbyterian, Methodist, Baptist, Lutheran, nga nagaanhi na aron makabaton og Lana, nan mao pud kana ang takna nga miabot ang Pamanhonon. Hinumduman nato kana.

¹⁰ Wala pa gyud sukad nahitabo kanako nga si Billy, ang akong anak, nga mosulti og ingon-niana kanako sama sa gihimo niya kaganina lang. Ingon niya, “Daddy, dili ta ka ginasultihan sa kung unsay imong buhaton. Dili ko usab buut nga magpa-bilib kanimo sa unsa mang butang, apan,” miingon, “daddy, bisan unsa ma’y imong buhaton, igahin mo ang tanan mong oras para sa ila nga mga masakiton.” Ingon niya, “Wala pa gyud ko sukad nakakita og ingon ka daghan kaayong mga masakiton!” Ingon pa, “Nakapanghatag na ko og duha ka gatus ka mga prayer kard sulod sa usa ra ka gutlo o duha.” Miingon, “Pagkadaghan kaayong mga tawong masakiton!” Panagsa ra kaayo ko niyang sultihan og ingon-niana.

¹¹ Ug dayon mianhi ako karong gabhiona nga may pipila ka diyutay’ng mga sinulat dinhi, ug pipila ka mga komento mahitungod sa nagasingabot na nga paghukom, ug nasayod kita nga ania kita nagalingkod karong gabhiona nga ang mismong kapungot sa Dios anaa lang sa ilalum nato, ug sa dili madugay

mohampak na kini. Ug nasayod pud kita nga nagahulat lang ang maong kapungot sa Dios; nga sa kalit lang moingon na, katapusan na, para sa mga minilyon. Ug nasayod ko niana sa akong kasingkasing, ug nasayod ko nga mahitabo gyud kana! Ug dayon makita nato ang daghan kaayong mga may sakit, nga nagakadasok ug nagapaninguhang makaduol.

¹² Ug nakahunahuna ko, “Karong gabhiona, kadaghanan kanila mga Cristohanon.” Ug tugoti ko nga isulti kini, kaninyo nga mga anak sa Dios. Bisan unsa ma’y inyong ginahimo, biya-i ninyo ang tanang uban pang butang. Alagari ninyo ang Dios, adlaw ug gabii, sa tibuok ninyong kasingkasing. Kamo, mabati man ninyo nga aduna gyu’y sayup. Makasulti mo niana sa diha nga maglakaw kamo sa mga kadalanan, inyo gayud . . . ug bisan asa man mo moadto. Kabalo mo, kung espirituhanon kamo; ug nasayod ako nga kamo espirituhanon gayud.

¹³ Ug nagpakig-estorya ako sa usa ka lalaki, kang Igsoong Stromei. Wala ko kahibalo kon ania ba si Tony, o wala. Siya, siya’y . . . [Nagaingon ang usa ka igsoong lalaki, “Tony Salameh?”—Ed.] Tony Salameh, Salameh, Salameh? Dili. Lahi diay nga Tony. [Adunay ginaingon ang igsoong lalaki.] Dili, dili kana nga Tony. Si Tony kini nga—nga—nga taga-Tucson. Unsa gani ang iyang apelyido? [Adunay nagaingon, “Stromei.”] Stromei! Ang nahibal-an ko nga Salameh, Stromei, o mora’g ingon-ana. Ako’y . . .

¹⁴ Didto sa iyang tindahan, sa miaging adlaw, adunay misulod nga usa ka lalaki, nga makahibulongan kaayo, aduna man gud siya’y gisulti nga nakapahinumdom kanako, niadtong ako . . . sa miaging higayon nga atua ako sa—sa India.

¹⁵ Diin, sa hunahuna ko gihatagan kami didto sa Ginoo og pinakadaghang mga mananambong nga nagkaaduna kami diha sa usa ra ka higayon, didto kini sa Bombay. Wala na gani mi’y makita nga lugar sa bisan asa aron mapalingkod silang, napulo ka mga linibo ug mga linibo ka mga tawo.

¹⁶ Ug sa wala pa mi miadto didto, dunay hinubad nga usa ka mantalaan. Bueno, didto man gud, usa ka nasud ang India nga dunay duha ka nanguna nga mga pinulongan, og kadto mao—kadto mao ang sa Iningles nga mantalaan. Ug ang ingon, “Bueno, siguro human na ang linog, tungod kay ang mga langgam nanglupad na man pabalik sa ilang pinuy-anan sa ilang mga salag.”

¹⁷ Pipila ka adlaw niadto sa wala pa mahitabo ang maong linog, nga nagpahugno sa mga paril ug mga ingon-anang butang. Ang gagmay’ng mga langgam atua pa sa ilang kaugalingong mga silonganan diha sa dagkung mga bato, ug nanagbuhat sa ilang mga salag; ug inig ka hapon o inig ka udto, sa dihang init na kaayo ang adlaw, mopaduol na ang tanang mga hayop niadtong mga paril, aron makapasilong. Pero sa mga duha ka adlaw,

nanagtugdon ra ang mga langgam didto sa mga kahoy, wala na sila nangadto sa ilang mga salag; ug duha ka adlaw usab, nga ang mga kahayopan, ang mga karnero ug ang mga baka, wala na sila nag-alirong inig ka hapon, o nagpasilong niadtong mga paril. Sila—nagpabilin ra sila didto sa umahan ug nagsandiganay sa usa'g usa, para malandongan.

¹⁸ Dayon sa kalit lang, naglinog, nga miuyog og ayo sa mga paril ug nagpalumpag sa mga bilding. Ug, kita n'yo, kung atua pa kadtong gagmay'ng mga langgam didto, sigurado gyud nga nangamatay sila. Kung ang mga baka atua pud didto ilalum niadtong mga paril, ug ang mga karnero, sigurado gyud nga nangamatay pud sila. Ang Dios mismo kadto nga nagapasidaan sa kinaiyahan!

¹⁹ Pipila pa lang ka adlaw ang milabay, didto sa tindahan ni Igsoong Tony, nagapaminaw ako sa usa ka lalaki didto nga miingon. . . Sa dihang nahitabo kadto nga linog sa Alaska, nangisda kono siya didto sa ginatawag nato nga Stony Point, didto sa Mexico. Ug ingon siya, “Wala man nangaon ang mga langgam, ug wala pud nangaon ang mga isda. Aduna gyu'y sa kung unsang sayup. Ug, sa kalit lang, nahitabo ang linog.”

²⁰ Ug niadtong miaging adlaw, sa dihang nahitabo kadto nga linog didto sa India, o sa kung asa man kadto nahitabo, ingon niya nga nangisda na pud kono siya. Nakahunahuna siya, “Bueno, pagkatalagsaon niini. Mangaon man gyud ang mga isda niining mga panahon. Wala man la'y sulog sa tubig, sa kung asa man. Linaw ra kaayo ang tubig, mao man gud kini nga panahon nga mangaon ang mga isda, apan ayaw man nila mangaon. Ug ang tanang mga langgam sa kasagaran nga anaa na unta dinha, ang mga kanaway, nagapangdagit na unta ang mga niini og mga isda ug uban pa, nagalakaw-lakaw na unta sila dinha sa tampi, nagakatapok na unta sila didto. Pagkataudtaud, ang mga lumot sa dagat nga gikan sa ilalum hinay-hinay nga mipaibabaw nga sama *niana*, aduna diay linog nga nahitabo sa pikas nga bahin sa kalibutan.” Kita n'yo, nasayod kadtong mga isda nga aduna gyu'y dili maayo, nga aduna gayu'y mahitabo. Nasayod usab ang mga langgam.

²¹ Sigurado gayud, nga kung ginahatagan man sa Dios og pagpang-ila ang isda ug ang langgam, unsa pa kaha ka labaw nga hatagan usab Niya niini ang Iyang—Iyang mga anak! Nasayod kita nga ania na 'ta sa katapusang panahon, ug nagahulat na ang paghukom, busa magmatinahaon gayud kita. Pagpangalagiw na kamo paingon sa Dios sa tibuok ninyong kasingkasing! “Oh Capernaum, ikaw nga gituboy ngadto sa langit, siguradong igaunlod gayud ngadto sa impiyerno,” ug karon atua na kini ngadto sa kinahiladman sa tubig. Timan-i kini ninyo, ug mag-ampo gayud.

²² Karon, niining gabhiona, gusto kong mobasa og usa ka bahin dinhi sa Kasulatan, sa makadiyut lang. Magaampo pud kita para sa mga may sakit. Ingon si Billy nanghatag na kono siya og daghang mga prayer kard. Ug nakapanghatag na siya og pipila kagahapon, ug wala ko pa natawag ang uban kanila kagabii. Ug naghunahuna ko, sa dihang miabot ang Balaang Espiritu . . . Kini gayu'y . . . Dili mo Kini maipa-pamuhat. Kini'y sama lang sa usa ka gamay'ng pangligwat, ikaw mismo ang mokambyo sa engranahe. Kamo mismo ang nagapalihok sa Balaang Espiritu, dili ako. Kamo mismo ang nagahimo niana. Busa ako, kagabii, namatikdan ko nga bisan sa pagpang-ila, wala kini misantop og ayo sa mga tawo. Daw sa wala nila mahisabti kini. Nahibaloan nako, dinhi bag-o lang, nga daw sa, halos ingon-ana gayud, sama sa gisulti ko na, nga ang ako rang pagpandong og mga kamot nganha sa mga masakiton, ang nahibaloan nila.

²³ Kinahanglan maamgo nato nga gikahatag na kini kanato, kanato nga mga nagatoo kang Jesus Cristo ug natawo na sa Iyang Espiritu ug napuno nianang gahum nga nagahatag og kinabuhi, nga kanang gahum anaa kaninyo. Pinaagi sa pagpandong og mga kamot, ngadto sa uban, sama sa gihimo sa mga tinunan kaniadto ug sa tanang mga nangaging kapanahonan, walay pagduhaduha nga giayo Niini ang mga may sakit, gibanhaw ang mga patay, nagpakita usab Kini og mga panan-awon, og mga propesiya. Ug ang mismong Espiritu nga mipuyo uban sa mga nahaunang apostoles kaniadto nagapuyo gihapon sa iglesia sa karon, nagapamuhat sa mao ra mismong mga butang. Ug sa ingon kadali nga maila nato kana! Kita n'yo, bisan unsa pa ang pagpamuhat niini, kinahanglan mong ilhon kana ug toohan kana. Dili gyud kini magpulos, hangtud nga toohan ninyo kini. Apan sa higayon nga toohan n'yo kini, nan tapos na ang inyong mga problema. Tinuod kana.

²⁴ Karon atong ablihan ang Kasulatan. Nagalingkod ako dinha, kaganina, nga nagsulat og dugang pa nga mga Kasulatan, aron usbon ang akong teksto para niining gabhiona. Ug gusto kong mobasa og pipila gikan sa Pulong sa Dios, gikan sa Basahon ni San Lucas, sa ika-8 nga kapitulo, sugod diha sa ika-40 nga bersekulo. Paminaw mo karon, tungod magabasa ako og taas-taas.

Ug nahitabo, nga, sa paghibalik ni Jesus, gidawat siya sa katawhan: kay silang tanan nanagpaabot man kaniya.

²⁵ Dili ba usa kana ka maayo nga taras para sa kadaghanan sa mga tawo niining gabhiona?

Ug, ania karon, may miabot nga usa ka tawo nga ginganlan si Jairo, ug siya usa ka punoan sa sinagoga: ug siya mihapa sa tiilan ni Jesus, ug nagpakilooy kaniya nga moadto siya sa iyang balay:

Kay siya may bugtong anak nga babaye, nga may napulo ug duha ka tuig ang panuigon, ug kini siya himalatyon. Apan sa naglakaw siya ang mga tawo nanagdudtod libot kaniya.

Ug ang usa ka babaye nga gitalinug-an sulod sa napulo ug duha ka tuig, nga nahutdan na sa iyang tanang kabuhian nga gigasto alang sa mga mananambal, ug wala siya mamaayo ni bisan kinsa kanila,

Miduol sa likod niya, ug mihikap sa sidsid sa iyang sapot: ug sa gilayon mitang-on ang talinugo niya.

Ug miingon si Jesus, Kinsa ba ang mihikap kanako? Ug sa nangambut ang tanan, miingon si Pedro ug sila nga diha uban kaniya, Magtutudlo, ang kadaghanan nagalibot kanimo ug nagadudtod kanimo, ug moingon ka, Kinsa ang mihikap kanako?

. . . miingon si Jesus, May mihikap kanako: kay gibati ko nga may gahum nga migula kanako.

Ug sa pagkakita sa babaye nga wala siya masalipdi, miduol siya nga nagakurog, ug mihapa sa atubangan niya, ug gisugilon ngadto kaniya sa atubangan sa tanang mga tawo ang hinungdan sa iyang paghikap kaniya, ug naunsa nga naayo siya sa gilayon.

Ug si Jesus miingon sa babaye, Anak, pagkalipay: ang imong pagtoo nakapaayo kanimo; lumakaw ka nga malinawon.

Ug samtang siya . . . nagsulti pa, may usa nga miabot gikan sa balay sa punoan sa sinagoga, nga miingon kaniya, Patay na ang imong anak nga babaye; ayaw na pagbudlaya ang Magtutudlo.

Apan sa pagkadungog ni Jesus niini, siya mitubag kaniya, nagaingon, Ayaw kahadlok: sumalig ka lamang, ug mahiulian ra siya.

Ug sa misulod na siya sa balay, wala niya pasudla bisan si kinsa, gawas kang Pedro, . . . ug kang Santiago, ug kang Juan, ug ang amahan ug ang inahan sa dalaga.

Ug ang tanan nanagpanghilak, . . . nanagminatay kaniya: ug miingon si Jesus, Ayaw na kamo paghilak; kay siya wala mamatay, kondili nagakatulog.

Ug sila nangatawa sa pagbiaybiay kaniya, sa hingbaloan nila nga kini patay na.

Apan gipagawas niya silang tanan, ug iyang gigunitan siya diha sa kamot, ug gisangpit ang maong dalaga, nga nagaingon, Dalaga, bumangon ka.

Ug mibalik kaniya ang iyang espiritu, ug siya mibangon sa gilayon: ug nagsugo si Jesus nga hatagan kini siya og pagkaon.

Ug nahibulong ang iyang mga ginikanan: apan siya nagsugo kanila nga dili sila magsugilon kang bisan kinsa sa nahitabo.

²⁶ Karon mag-ampo kita. Minahal nga Langitnong Amahan, sa pagbasa namo niining Pulong, nasayod kami nga kamatuoran kini. Nahitabo gyud kini kaniadto. Dili kini usa ka tinumotumo lang nga sugilanon nga mabasa namo tingali gikan sa usa ka mantalaan o sa usa ka libro sa tinumotumo lang nga mga estorya, kondili nagagikan kini sa Libro nga hingsayran namo nga mao ang Pulong sa Dios. Nagatoo kami nga nahitabo kini. Nagatoo kami nga kining Jesus nga mibuhat niining halandumon nga butang, duha kini ka mga panghitabo, ang mahitungod sa babaye nga may talinugo, ug ang mahitungod sa namatay na nga bata, nagatoo kami nga si Jesus mao ang Anak sa Dios, nga gibanhaw Siya sa Dios gikan sa mga patay ug ginapresentar Siya nganhi kanamo, karong gabhiona, diha sa persona sa Espiritu Santo.

²⁷ Ug nagatoo kami nga ania Siya mismo uban kanamo niining gabhiona. Ug nagatoo kami nga Siya mao sa gihapon kagahapon, karon, ug hangtud sa kahangturan, nga ang Iyang kalooy nagaabot sa mga tawo. Ug sa diha nga magapangabot ang mga tawo diha Kaniya, ang mao gihapong mga resulta nga gikahatag sa kaniadtong mga adlaw igahatag usab niining adlaw. Itugot kini pag-usab, Amahan, aron mabatonan namo ang lab-as nga pagdihog. Ingon nga matinud-anon kaayong naghangyo si Igsoong Shakarian, kaganina, ug gihangyo ang mga mananambong nga managpanoo, nagapangamuyo kami pag-usab sa Ngalan ni Jesus Cristo. Amen.

²⁸ Gusto kong manulti sa makadiyut lang, ug kana'y sa pipila lamang ka gutlo, tungod gusto ko nang palinyahon dinhi ang mga tawo nga aduna na'y mga prayer kard ug mag-ampo para kanila. Ug wala na'y uban pang butang gawas lang sa pag-ampo para sa mga may sakit. Apan sa dili pa nato iampo ang mga masakiton, kinahanglan usà natong dalhon ang mga tawo sa ingon-niana nga taras. Ang taras maoy nagahatud sa kanunay og mga resulta. Ang inyoha kining taras ngadto sa Dios.

²⁹ Ania ang usa ka babaye nga mihikap sa Iyang bisti, og naayo kini, sa iyang talinugo. Gilud-an Siya sa usa ka sundalo diha sa Iyang nawong ug gipurong-purongan og mga tunok ang Iyang ulo, ug wala man la'y gibati nga gahum.

³⁰ Ang inyoha kining pamaagi sa pagduol. Ang hustong taras ang mao'y gikinahanglan. Ug ingon niana usab karong gabhiona, minahal nga higala, nagkinahanglan kini og hustong taras. Kita gayu'y, ug nagatoo 'ta nga anaa kita, sa Presensiya ni Jesus

Cristo, apan ang inyoha kining hustong taras ang nagadala og mga resulta. Ania na ang mekanika, ug usab ang dinamika. Kung mahimo n'yo lang sugdan, ang Dios na ang bahala sa uban pa.

³¹ Karon, kining hilisgotanan nga gusto kong hisgotan, sulod sa pipila ka gutlo, mao: *Ang Pagpamatuod Sa Iyang Pulong*. Karon usa kana ka dakung butang, nga palandungon kana: *Ang Pagpamatuod Sa Iyang Pulong*.

³² Karon may kasarang gayud ang Dios nga pamatud-an ang Iyang Pulong, karong gabhiona, maingon sa pagpamatuod na Niya Niini kaniadto. Ug miingon usab ang Biblia, “Sulayi ninyo ang tanang butang. Kupti ninyo kung unsa ang maayo.”

³³ Karon nadungog na ninyo, tingali, nadungog n'yo na ang karaang panultihon, “Pamatud-i kini, og motoo ko niini.” Apan dili man gihapon kana tinuod. Makadaghan nang higayon nga nakakita ko og daghang mga butang nga gipamatud-an, bug-os gayud nga siyentipikanhong gipamatud-an, ug sa gihapon wala mitoo ang mga tawo niini bisan pa man.

³⁴ Nagpakig-estorya ako sa usa ka lalaki, dinhi dili pa lang dugay. Naghisgot kami mahitungod sa Balaanong pagpang-ayo. Ingon siya, “Dili ko motoo niana. Dili ko igsapayan bisan unsa pa'y mahitabo, bisan unsa pa kadaghan sa ebidensiya nga maipakita mo bahin niana, dili gihapon ko motoo niana.” Bueno, sa tinuod lang, bisan unsa pa'y buhaton mo para niana nga tawo, siya—siya'y malaglag na gyud. Dili man siya makatoo. Wala ma'y bisan unsa diha kaniya, nga makatoo.

³⁵ Bag-ohay lang kong nagkaaduna og—og diyutay'ng kasinatian dinhi, mga usa na ka semana ang milabay, nakahibalo na man mo nga ako—nagapangayam ko. Ug sa pagbalik nako gikan sa akong panagtigum, nagapangayam na ko og leon. Ug human nga mibalhin ko sa Arizona, maayo ra man, ganahan man gud kong mangayam og dagkung mga hayop, ug gusto ko gayud moadto sa tunga sa kinaiyahan ug suhiron kini.

³⁶ Karon, dili ako usa ka tigpamatay. Nagapangayam lang ako. Busa, ako—dili ko gustong mopatay og mga hayop, wala ako—ako nagahunahuna nga husto kini. Sa hunahuna ko nga sala gayud ang mopatay og hayop, pag dili mo kini gamiton ug gamiton para sa usa ka katuyoan, sama ra nga nagapatay ka og unsa pa man nga butang. Nagatoo kong sayup kini. Dili nato angay'ng buhaton ang ingon-ana. Gihatag kini sa Dios kanato para makaon ug para sa mga katuyoan, ug dili gyud nato angay'ng patyon ra kini. Apan karon kung unsa ma'y ginaingon sa balaod nga puede mong pangayamon, maayo. Basta ayaw lang gyud kini usik-usiki.

³⁷ Ug atua ako didto, sigo gayud ang maong tiyempo para sa uban pang butang. Daghan nang mga baka ang gipamatay niadto sa mga leon. Ug kaila ko og daghang mga rantsero didto sa

maong lugar. Ug sa matag higayon nga makakuha sila og patay na nga hayop, aba, tawgan nila ako, pag may leon nga nakaduol sa mga karnero. Ang usa nako ka higala, sa miaging gabii, nawad-an siya og halos traynta'y-singko ka gatus ka dolyares, sa usa ra ka gabii, tungod sa usa ka leon nga gipamatay ang mga karnero. Nakasulod man kini, ug, siyempre, ang tanang uban pa nga mga leon kinahanglan man mobayad sa sala niini. Ug busa napatay ko ang maong leon, ug usa kadto ka daku kaayo nga leon, ug siyam-ka-piye ang gitas-on, ug mitimbang og halos duha ka gatus ka libra, busa usa kadto—kadto ka daku kaayo nga leon.

³⁸ Ug pagkahuman niadto migikan na ko sa maong dapit sa Arizona, paingon ngadto sa Utah, aron mangayam. Ug busa giingnan na man ko nga adunay mga mangangayam didto, nga ang usa ka tawo nga makauban nako sa pagpangayam, usa kono ka mangangayam sa gobyerno, “Ug, palihog lang, ayaw gyud paghisgot og unsa man mahitungod sa relihiyon, sa iyang atubangan.” Giingnan ko, “Usa gayud siya ka salbahis nga tawo.”

³⁹ Ug ingon ko, bueno, giingnan ko ang maong tawo nga akong kauban, ingon ko, “Sige dili ko maghisgot niini.”

⁴⁰ Ingon siya, “Ayaw pagsulti man lang og ‘magwawali.’ Kay kung masulti mo, dili ka na gyud makapangayam. Dili na ka niya paubanon.” Ingon pa, “Nakapangayam na ko uban kaniya sulod sa tulo ka adlaw, ug natulog kauban niya sa matag gabii, nagakaon uban niya sa matag adlaw, ug wala gyud siya’y gisulti bisan man lang og, ‘Maayong buntag. Kumusta man ka? Aduna ka ba’y gustong kaonon? Manghugas lang siya og mga gikan-an.’ Og wala na!” Miingon, “Karon ayaw baya gyud pagsulti og unsa man mahitungod niini.”

⁴¹ Ingon ko, “Sige wala ko’y isulti ni usa ka pulong.” Pero wala ko siya giingnan nga dili ako moampo, apan sige ko lang siyang giingnan nga ako’y . . . Ug nag-ampo ako.

⁴² Busa sa diha nga nakaabot na mi didto, ang maong tawo aduna gayu’y maisug nga kinaiya, ug sa hunahuna ko wala siya’y gitooan og bisan unsa man. Ug bag-o lang siyang namatyan og bata pipila ka gabii sa wala pa ang maong pagpangayam, usa ka bata nga patay na nga gipanganak. Busa, nangayam na ’mi. Ug sa ikaduhang adlaw, giingnan diay siya sa maong lalaki nga kauban nako sa pagpangayam, miingon nga nagapangayam kono ko sa bisan asa sa tibuok nasud. Busa sa diha nga ang maong mangangayam, nga kauban nako, mibiya na, nagapaingon kami niadto sa pinakaitaas sa bukid; diin bag-ohay lang namong gigukod ang usa ka leon, hangtud nga miabot kami ngadto sa mga bato, ug nakaikyas kini. Ug busa nanglingkod usà mi didto nagahulat nga mobalik ang iro. Ug giingnan ako niining maong tawo, ingon siya, “Kadtong usa

pa ka mangangayam, nga imong higala, nag-ingon siya nga nagapangayam kono ka sa bisan asa. Aduna diay ka'y daghang kuwarta?" Miingon, "Siguro wala na ko'y labot niana."

⁴³ Ug ingon ko, "Dili man," ang ingon ko, "dili man sa ingon nga daghan og kuwarta." Ingon ko, "Ako—aduna lang ma'y nagpaluyo kanako."

⁴⁴ Ug ingon siya, "Oh, mao ba." Ingon pa siya, "Bueno, siguro wala na usab ko'y labot niini, pero," miingon, "anaa ka ba sa usa ka kompanya nga mao'y nagapaluyo nimo?"

⁴⁵ Ginapugos gyud ko niya. Nagsaad na unta ko nga dili ko mosulti og unsa man, kita n'yo. Busa miingon ko, oo, ingon ko, "Dili, sir. Usa ako ka magwawali, usa ka misyonaryo."

Ingon siya, "Unsa?"

⁴⁶ Ingon ko, "Misionaryo." Ug mitindog siya ug mitan-aw kanako sa pipila ka minuto.

⁴⁷ Ingon ko, "Aduna ka ba'y paglaum alang sa Kinabuhi sa umalabot? Unsa ma'y imong ginalauman?"

Ingon siya, "Usa man ko ka Jack Mormon."

Ug ingon ko, "Unsa?"

Ingon siya, "Usa ka Jack Mormon."

Ingon na pud ko, "Unsa man kana nga matang?"

⁴⁸ Miingon, "Kanang nagapamalikas ug nagainom og kape, ug nagapanigarilyo."

Ingon ko, "Bueno, maayo baya kanang usa ka matinud-anon nga pagsugid."

⁴⁹ Ug dayon ingon siya—ingon siya, "Aduna ko'y gustong ipangutana kanimo." Ingon siya, "Gikasultihan baya ko nga ang iglesia'ng Mormon lang kono ang bugtong tinuod nga iglesia." Ingon pa siya, "Nagatoo ka ba niana?"

⁵⁰ Ingon ko, "Kung iglesia ang paghisgotan, sa hunahuna ko ingon ra kini ka pareho sama sa uban pa kanila. Usa lamang ka Kamatuoran ang nahibaloan ko, ug kana mao si Jesus Cristo." Ingon ko, "Nasayod gyud ko nga Siya ang mao'y Tinuod."

⁵¹ "Bueno," ang ingon niya, "Aduna man gud ko'y usa ka bata nga nahimugso niadtong miaging gabii, patay na kini nga gipanganak." Ingon siya, "Gikasultihan man gud ko nga kining bataa kono, tungod kay patay na kini nga gipanganak, wala gyud daw gininhawa sa kinabuhi nga gihuyop ang Dios ngadto niini, mao nga dili ko na gayud makita kini pag-usab." Ingon siya, "Unsa ma'y hunahuna mo mahitungod niana?"

⁵² "Bueno," ingon ko, "Dili mo gyud makita kini samtang usa ka pa ka Jack Mormon, dili gayud. Mao kana'y usa ka butang nga sigurado, dili mo makita kini samtang nagapabilin ka pa nga usa ka Jack Mormon." Ug ingon siya... Bueno,

ginahagit man gud ko niya, mao nga gihagit ko usab siya'g diyutay, nakita n'yo. Nagkaaduna kami og—og higayon niadto nga maghinagitay. Busa miingon siya—ingon siya . . . Ingon ko, “Unsa ma'y nahitabo?”

Ingon siya, “Oh, wala ko nahibalo.” Ug ingon siya, “Bueno, unsa ma'y hunahuna mo?”

Ingon ko, “Aduna ko'y kaila nga daghang buutan nga . . .”

⁵³ Wala ko kabalo nga usa diay siya ka Mormon. Ug ako gayu'y . . . Kabalo ko, ingon nga atua ako sa Utah, tingali'g mao gayud, apan akong . . . tungod ang kadaghanan sa mga tawo didto mga Mormon man, didto sa may Salt Lake City. Dili kadto'y Salt Lake City, dili man. Busa nakahunahuna ako, “Bueno, aduna man ko'y pipila ka mga higalang Mormon, nga nakaapil na sa mga linya sa pagpaampo, buutan nga mga tawo.”

⁵⁴ Ug ingon ko, “Nakahimamat baya ko og pipila ka buutan kaayo nga mga tawo nga mga—mga Mormon.” Ug ingon siya, bueno, ingon siya . . . Ingon ko, “Wala lang ko nasayod sa ilang pagtulon-an mahitungod niana, ug ayaw ko usab mosulti og butang nga supak sa ilang pagtulon-an, tungod kay ikaw mao man kung unsa sila, ug ginatahud ko gayud kana.” Ug ingon pa ko, “Bueno, ug nagatoo ka ba niana?”

Ingon siya, “Oo, sir, nagatoo ko. Apan,” miingon, “Wala lang nako gikinabuhi kini.”

⁵⁵ Ingon ko, “Bueno, nagatoo ko nga nagatudlo ang Biblia nga naila na sa Dios kana nga bata, kaniadto pang minilyon ka mga tuig, sa wala pa ang pagkatukod sa kalibutan.” Ingon ko, “Gisultihan sa Dios si Jeremias kaniadto, ‘Sa wala ka pa gisamkon sa tagoangkan sa imong inahan, sa wala ka pa migula gikan sa iyang tiyan, naila Ko na ikaw, gibalaan ka na, ug gikatagana ka na nga usa ka propeta sa mga kanasuran.’” Ingon ko, “Ingon niana usab ang pagkahibalo Niya mahitungod niini, kita mo.”

Ang ingon niya, “Bueno,” ingon siya, “salamat.”

⁵⁶ Misugod na siyang milugsong gikan sa bungtod. Ug dayon gitagbo niya kadtong usa pa ka mangangayam, ug iyang giingnan, “Nganong wala man ko nimo sultihi nga kanang tawhana usa diay ka magwawali?” Ug pagkahuman among . . . Nagpakig-istorya siya kaniya sa makadiyut ug misugod na sa pagsulti kaniya mahitungod sa mga panagtigum.

⁵⁷ Karon, nagatoo man og propesiya ang mga Mormon. Wala ko . . . wala man tingali og usa kanila dinhi, apan sila—apan nagatoo gyud sila og—og propesiya. Ug, busa, tingali'g sayup ang pagsulti ko niini, apan ako . . . Oo. Oo. Apan, bisan pa niana, nagatoo gyud sila.

⁵⁸ Ug ingon siya, mibalik siya kanako, miingon, “Hingsayran ko nga usa diay ikaw ka propeta.”

59 Ingon ko, “Dili, sir.” Ingon ko, “Ako . . . Ang Ginoo nagpakita lang kanako og pipila ka mga butang nga mahitabo.”

60 Ug milakay na siya, dayon, og miingon, “Adto na ’ta.” Ug misakay na siya sa iyang sakyanan, ug miadto na paingon sa . . . diyutay’ng siyudad kon diim siya nagapuyo. Sulod sa pipila ka gutlo, nawala na siya. Ginaandam na pud namo ang mga iro niadto, aron mangayam na usab pagkahuman mismo sa paniudto. Ug samtang nangandam pa mi, aba, nakasakay na siya sa iyang sakyanan.

61 Sa pipila ka gutlo, dunay mibalik nga usa ka ambonga’ng batan-ong lalaki, nga mga dise-siete anyos ang panuigon, usa ka Cristohanong maayong lalaki nga balaan kaayong tan-awon. Ingon niya, “Ako kining igsoon.” Miingon, “Dili siya usa ka Jack Mormon. Siya’y tinuod gayud nga Mormon.”

Ingon ko, “Kumusta man ka, dong?”

62 Ug miingon ang batan-ong lalaki, “Nasabtan ko, nga gisultihan ko sa akong igsoon, nga usa kono ikaw ka propeta.”

63 Ingon ko, “Dili, sir.” Ingon ko, “Dili man ko usa ka propeta.” Ingon ko, “Gipakita lang sa Ginoo kanako ang mga butang nga magakahitabo.”

64 Ingon siya, “Aduna ko’y indyeksiyon sa akong bukton karon mismo, og nakahigda na unta ko karon sa operahanang lamesa.” Ingon siya, “Apan giingnan man ko sa akong igsoon bahin niini. Ug ingon ko, ‘Kung ingon-ana man gani, nan dili ko na gikinahanglan ang operasyon.’” Gitutokan ko niya mismo diha sa mata, usa ka matinud-anon, tinuod, og sinsero nga pagtan-aw, miingon, “Ipandong mo ang imong mga kamot kanako. Kung tinuod man kining mga butanga, nan dili ko na gikinahanglan ang operasyon.” Ngani miuli ang maong batan-ong lalaki nga ayo na.

65 Kini nga igsoon, nga akong Cristohanong higala, nangayam uban kanako, didto sa Phoenix. Miingon siya kanako, ingon siya . . . Ang pipila sa niining mga lalaki ania nagalingkod mismo karon. Usa kanila ang hingsayran ko nga ania dinhi karon. Nagapauli na ’mi kaniadto. Ingon siya, “Igsoong Branham, kung magpakita kanimo ang Ginoo og usa ka panan-awon ug tugotan kang sultihan silang mga Mormon kung unsa gayud ang mahitabo, igo na kana, tungod kay nagapaabot man sila niini.”

66 Busa, nag-ampo ako ug nag-ampo. Ug sa akong dalan pabalik sa balay, pauli na ko niadto, pagkasunod Lunes, Dominggo niadto, sa mga alas diyas, nagatindog ako sulod sa lawak, pagkahuman sa simba niadtong buntaga, ug mitan-aw ako sa gawas.

67 Ug nakakita ko og mga flashlight nga nagapangidlap, o usa ka matang sa kahayag nga nagakidlap. Ug may nakita ko nga usa ka leon nga anaa sa usa ka kahoy, ug—ug gamay ra kaayo

kadto para pusilon ko. Ayaw nako niadto. Ug adunay usa pa ka tawo nga mipusil niadto, ug, sa ilang pagpusil, gipusil nila kini gamit ang usa ka daku kaayo nga pusil. Nabungkag gyud ang maong leon. Wala ko gyud nagustohi ang—ang—ang paagi sa pagpusil niadto.

⁶⁸ Sa pag-adto ko sa Phoenix, gisuginlan ko si Igsoong Dawson bahin niadto, ug si Igsoong Mosley usab. Nasayod ko nga ania siya karon. Nakita ko man gud siya sa miaging adlaw, sa usa ka dapit dinhi. Ug miuban siya kanako, siya ug ang iyang asawa. Ug miingon ko, “Matikdi ug tan-awa ninyo, kana’y MAO KINI ANG GINAINGON SA GINOO. Mahitabo gyud kini sa ingon-nianang paagi.”

⁶⁹ Naghulat kami og pila ka gabii, upat o lima ka gabii, nga nangayam kami, nga ingon niana usab ka adlaw. Panagsa ra kaayo kang makakita og usa ka leon nga anaa sa kahoy inig kagabii. Nahitabo nga, sa pag-abot nila, gibuhian nila ang mga iro, kadtong mangangayam, kadtong lalaking Mormon. Ug nakakita ang—ang leon og usa ka agianan, o nakit-an sa iro ang giagian sa leon, diay, ug gigukod ang leon mao nga nakakatkat kini sa kahoy. Ug pagka alas-diyes sa gabii nangabot sila, gipangpukaw kami. Giadtoan namo didto, ug atua kadtong mao ra nga leon nga anaa sa kahoy. Gi-flashlightan, og gipusil kadto ni Igsoong Mosley gamit ang usa ka kuwarenta’y-kuwatro nga kalibre, nga halos nabungkag gayud ang maong leon. Ug mao kadto, nga eksakto gayud sa pagkasulti niini.

⁷⁰ Pagkasunod adlaw, nahimamat ko ang hepeng tigbantay sa mga pagpangayam sa maong probinsya, nga usa usab ka Jack Mormon. Naagak ko kadto nga mga lalaki pabalik ngadto kang Cristo.

⁷¹ Sultihan ko kamo, Siya mao sa gihapon kagahapon, karon, ug hangtud sa kahangturan. Ginapamatud-an gayud sa Dios nga ingon-niana ang Iyang Pulong.

⁷² Nakadungog na mo siguro sa mga tawo nga moingon, “Ang pagpakakita mao ang pagtoo.” Dili kana tinuod. Daghan mang mga tawo ang nakakita ug wala man gihapon sila nagtoo.

⁷³ Sa mga adlaw kaniadtong ania pa si Jesus sa yuta, nganong wala man nila Siya hiilhi, nga Siya mao kadtong Pulong sa Dios nga napadayag? Nganong wala man naamgo sa mga tawo nga miingon si Moises, “Ang Ginoo nga inyong Dios magpatindog og usa ka propeta nga sama kanako”? Ug gituman ni Jesus ang matag Pulong nga gikaingon sa Biblia nga Iyang pagabuhaton, apan wala man gihapon sila mitoo niini.

⁷⁴ Apan ang Dios, sa matag kapanahonan, nagpamatud gayud nga ang Iyang Pulong tinuod. Kanunay gyud Niyang ginapamatud-an ang Iyang Pulong. Dayon moingon pa sila usahay, nga, “Ang pagpakakita mao ang pagtoo.” Dili kana ingon-niana. Apan nasayod man kita nga ang Dios

padayon gihapong ginapamatud-an ang Iyang Pulong sa matag kapanahonan.

⁷⁵ Nasayod kita nga nagpamatuod usab Siya ngadto kang Adan ug ni Eva, nga sa dihang miingon Siya, “Sa adlaw nga kamo mokaon niini, sa nianang adlaw kamo mamatay gayud.” Kinahanglan natong dawaton kana, nga mao kana ang kamatuoran. Nagatoo kita niana, tungod kay gipamatud-an na Niya kini nganhi kanato, ug nasayod kita nga mao gyud kana ang kamatuoran.

⁷⁶ Karon maghisgot lang 'ta og pipila ka bahin kon diin gipamatud-an sa Dios ang Iyang Pulong. Atong hisgotan, pananglitan, ang mga adlaw ni—ni Noe kaniadto. Nagsulti ang Dios ngadto kang Noe og usa ka mensahe nga bug-os gyud nga dili-siyentipiko ug dili-katoohan. Wala gyu'y ni usa nga makatoo. Wala pa man gyud miulan sa yuta. Dili gyud siyentipiko!

⁷⁷ Tingali'g hilabihan pa gani ka siyentipikanhon ang kapanahonan nila kaniadto kay sa atoa karon, tungod kay nakatukod man sila og mga piramide ug mga sphinx, ug uban pa, niadtong mga adlaw, nga dili gyud nato arang himoon sa karon. Aduna sila'y kahibalo mahitungod sa usa ka enerhiya, sa usa ka matang sa mekanikal nga enerhiya, siguro sa atomika o ingon-niana, nga mahimo nilang alsahon kadtong dagkung mga bato, nga dili nato mahimo sa karon. Ug nakahimo gyud sila kaniadto og dagkung siyentipikanhong mga butang. Aduna pa sila'y usa ka butang nga mahimo nilang embalsamahon ang usa ka lawas, aron himoon kining natural tan-awon sulod sa gatusan ka mga katuigan. Nawala na kanato ang ingon-niana nga kahanas.

⁷⁸ Miingon si Jesus, “Maingon sa nahitabo kaniadto sa mga adlaw ni Noe, mao man usab ang mahitabo sa pag-abot sa Anak sa tawo.” Ug nasayod kita nga magasulod usab kita sa usa na usab ka dakung siyentipikong panahon.

⁷⁹ Ug ang mensahe nga aduna si Noe kaniadto sukwahi gyud kaayo sa tinoohan niadtong panahona, sa iglesia, ug sukwahi usab kaayo kadto sa siyentipikanhong pagtuki. Apan gipamatud-an sa Dios ang Iyang Pulong nga mao ang kamatuoran. Gipamatud-an sa Dios nga kung unsa ma'y gisulti sa maong propeta mao gayud ang kamatuoran.

⁸⁰ Maghisgot na usab kita og usa pa sa makadiyut lang. Si Abraham usa usab ka propeta sa Ginoo, kang kinsa miabot ang Pulong. Ug giingnan siya, nga sa dihang siya'y setenta'y-singko anyos na, ug si Sarah usab saysenta'y-singko anyos na, makabaton siya og usa ka bata kang Sarah. Karon, medyo makapakurat gyud kadto para sa usa ka dili-magtotoo. Mahunahuna n'yo ba, sa karon, ang ingon-anang butang nga mahitabo ilabina niining panahona, nga aduna na kanato ang

tanang mga siyentipikanhong kalampusan, ug ang tanan na niining mga test tube baby nga ginahisgotan nila, ug uban pa? Apan kining tigulang na nga babaye, nga saysenta'y-singko anyos na kaniadto, ug ang usa ka lalaki usab nga setenta'y-singko anyos na, apan miabot man ang Pulong sa Ginoo ngadto kang Abraham ug gisultihan siya nga mahitabo gyud kini. Ug gitooan ni Abraham ang Dios. Karon, bisan giunsa pa pagsulti sa Dios, ug unsa pa man ka tinuod kadto, kinahanglan nga toohan ni Abraham kung unsay gisulti sa Dios, aron mamahimo kadto. Karon matikdi n'yo kon daw sa unsa nga gisulayan kadto nga tawo, uban sa iyang testimonyo, nga siya gayu'y mitoo.

⁸¹ Kana mismo nga tawo nga mihimo niadto nga pamahayag, nga gitooan niya ang Dios, siya'y usa ka tawo nga sama ra usab kaninyo, nga nagalingkod dinhi karong gabhiona. Nagatoo gihapon kita sa Dios. Kinahanglan natong toohan ang Iyang Pulong nga mao ang Kamatuoran. Ug pamatud-an Niya kini, nga Kini mao ang Kamatuoran, kung toohan lang nato kini.

⁸² Karon tan-awa ninyo ang babag nga aduna si Abraham kaniadto. Unang butang mao ang iyang edad, nga setenta'y-singko anyos na, ug si Sarah usab nga saysenta'y-singko anyos na. Lagpas na si Sarah sa kausaban sa kinabuhi, sa pagmenopos. Sigurado gayud nga miundang na ang iyang regla, daghan nang mga tuig ang milabay. Nagpuyo si Abraham uban kang Sarah ingon nga iyang asawa. Igsoon niya kadto sa amahan, siguro giminyoan niya siya sa kaniadtong batang babaye pa kini diha sa iyang kabatan-on pa lamang, ug giminyoan na siya. Ug wala pa siya'y mga anak. Si Sarah bug-os pa gyud nga apuli. Ug karon hingsayran nato nga, aron mahitabo kini, kinahanglan usa niyang ihimulag ang iyang kaugalingon gikan sa tanang mga tawo nga wala mitoo niini, aron nga mamatuman kini.

⁸³ Wala ko ginapasabot nga kinahanglan ninyong ihimulag ang inyong kaugalingon gikan sa mga tawo. Kondili kinahanglan n'yong ihimulag ang inyong kaugalingon gikan sa tanang pagpanglibak sa dili-pagtoo, ug pagpahilayo kamo niana. Pagmoingon ang mga tawo, "Ah, dili man mahitabo kanang mga butanga! Pundok ra kana sa mga buangbuang nga tawo! Wala ma'y ingon-anang butang nga mahitabo," takpi lang ninyo ang inyong mga dalungan ug maglakaw palayo. Ayaw na kini hatagi og bisan unsang pagtagad.

⁸⁴ Miingon ang Biblia nga, "Si Abraham wala nagduhaduha sa saad sa Dios, tungod sa kakulang-sa-pagtoo; kondili nagmaligon, nga nagahatag og pagdayeg ngadto sa Dios." Giusab ang iyang ngalan gikan sa Abram ngadto sa Abraham, ang pag-usab niini mao ang nagpahimo sa iyang ngalan nga, "amahan sa mga nasud." Mahunahuna n'yo ba ang usa ka tawo nga nagapuyo uban sa iyang asawa, ang iyang hinigugma, nga kauban niya sa pagpuyo sulod na niining daghang mga tuig, ug niadtong

panahona mga otsenta'y anyos na ang pangidaron, ug ang iyang asawa setenta'y anyos na, ug sa gihapon wala pa'y ni usa ka anak o unsa mang paglaum nga makabaton og anak, apan bisan pa niana nagapamahayag nga siya mao ang "amahan sa nasud." Mahunahuna n'yo ba ang kritisismo sa iyang nagapangagi nga mga isigkalungsoranon nga nagaingon, "Amahan sa mga nasud, pila na man diay kabuok ang imong mga anak sa pagkakaran?" Ug tanan nang mga kritisismo nga kinahanglan niyang agian!

⁸⁵ Apan si Abraham wala man lang nagduhaduha, nga nagkulang og pagtoo. Mitoo siya nga mahimo sa Dios nga tumanon ang Iyang gisaad, nga pamatud-an gyud sa Dios ang Iyang Pulong, bisan unsa pa man kadugay kadto. Apan imbis nga nagakaluya sa paglabay sa panahon, sama sa malagmit nga ginabuhat nato, mas nagmalig-on hinoon siya sa tanang panahon. "Kung dili man kini mahitabo karon, pagkaugma mamahimo kining mas daku pa nga milagro, tungod kay usa na pud ka adlaw ang milabay." Ang Dios kadto, ang Dios kadto nga anaa kang Abraham, kay nasayod man siya nga ginapamatud-an sa Dios nga ingon-niana ang Iyang Pulong.

⁸⁶ Kung toohan lamang sa Iyang mga anak ang Iyang Pulong, aron nga mahimo Niyang pamatud-an Kini pinaagi kanimo! Mao lang kana ang bugtong paagi nga mahimo Niyang pamatud-an ang Iyang Pulong.

⁸⁷ Dili Niya Kini ginapamatud-an ngadto sa mga dili-magtotoo. Dili man angay'ng mapamatud-an Kini kanila; sila'y mga dili-magtotoo. Ug, dili Kini ginapamatud-an para sa mga dili-magtotoo. Dili man Kini para sa mga dili-magtotoo.

⁸⁸ Kini'y alang ra kaniya nga nagatoo. Ug kung makakaplag ang Dios og usa ka tawo nga motoo sa Iyang Pulong, nan pamatud-an Niya ang Iyang Pulong pinaagi kanimo. Ug usahay nagakahitabo kanato ang mga balatian ug uban pang mga butang sa ingon-ana nga paagi, aron mahimong pamatud-an sa Dios ang Iyang Kaugalingon.

⁸⁹ Mahinumduman n'yo ba ang buta nga lalaki nga nakaplagan ni Jesus kaniadto? Ingon sila, "Kinsa ang nakasala, siya ba o ang iyang amahan, o ang iyang inahan?"

⁹⁰ Siya miingon, "Sa niini nga panghitabo, wala, kondili aron lang maipahayag ang mga buhat sa Dios." Kita n'yo, nahitabo kadto sa maong batang lalaki aron nga mahimaya si Jesus. Usahay ang balatian dili man usa ka tunglo, usa kini ka panalangin, aron mapalihok nato ang atong pagtoo dinha ug tawgon kadtong mga butang nga wala nagalungtad, ingon nga nagalungtad. Mao kana'y giingon na sa Dios, ug pamatud-an Niya kini nga mamaingon-niana gyud kini kung dili lang kamo maluya ilalum sa pagsulay.

⁹¹ Napamatud-an Niya si Job, usa ka higayon kaniadto, nga dili Siya niini tunglohon sa Iyang atubangan. Tan-awa n'yo lang ang

pagsulay nga giagian ni Job. Apan diha sa mismong apapangig sa kamatayon, sa gihapon siya miingon, “Ang Ginoo ang mihatag, ang Ginoo ang mikuha, bulahan ang Ngalan sa Ginoo!” Mitoo gayud siya. Gipamatud-an sa Dios ang Iyang Pulong kang Job. Gipamatud-an pud Niya kini kang Abraham. Gipamatud-an Niya kini nga mao gayud.

⁹² Gipamatud-an usab Niya kini kang Moises. Ug si Moises, sa diha nga grabe kaayo ang iyang kalisdanan, naghunahuna na si Moises, nga tingali’g, mamahimo siyang usa ka manluluwas, nga mao siguro nga gisulti sa iyang inahan kaniya nga gipanganak siyang usa ka matahum nga bata. Siya—siya nga mao ang iyang magtutudlo nga nagpadaku kaniya didto sa palasyo ni Faraon, walay pagduhaduha nga miingon kaniya, “Anak, nag-ampo gyud kami nga makalingkawas kami, ug nagatoo kami nga ikaw kanang maong bata nga pagagamiton sa Dios aron sa pagpalingkawas kanamo.” Ug dayon sa dihang siya . . .

⁹³ Kita n’yo, midaku siya ug ingon nga mamahimong anak sa—sa anak nga babaye ni Faraon, ug hingsayran nato nga gikatakda pud siya nga mamahimong manununod sa trono. Aba, nagpaabot na gayud sila kaniadto, nga mamahimo siyang sunod nga Faraon, “Ug sa ingon nianang paagi nga pagaluwason niya ang mga tawo, pinaagi sa pagkahimong sunod nga Faraon.” Apan ang Dios aduna ma’y . . . Kung ingon niana man, nan mahimong nabuhat niya lang kadto pinaagi sa usa ka pang-materyal, pinaagi sa usa—usa—usa ka pang-pulitika nga buhat. Apan ang Dios dili man sa una pa nagapamuhat og ingon-niana.

⁹⁴ Aduna ang Dios og kaugalingon Niyang mga pamaagi sa pagpamuhat, ug miingon Siya nga Iyang “ipahigawas sila.” Giingnan Niya na si Abraham, “Human sa upat ka gatus ka tuig,” Iyang “ipahigawas sila pinaagi sa gamhanang kamot,” Siya “magapakita og mga ilhanan ug mga katingalahan.” Busa dili puedeng buhaton kadto ni Moises nga ingon niana, busa si Abra- . . . Hingsayran nato nga gitooan gayud ni Abraham ang Dios, ug ania usab si Moises karon nga nagatoo sa Dios.

⁹⁵ Ug midungaw si Moises sa mao rang bintana nga gidungawan pud ni Faraon, og nakita niya ang mao ra nga mga tawo. Midungaw si Faraon ngadto kanila, ingon nga, “Usa ka tinunglo nga katawhan, usa ka katawhan nga walay unsa man kondili usa ra ka pundok sa panatisismo, tungod sa usa ka Dios, ug usa ka Dios nga atua sa kung asa man nga disyerto nga wala man lang sila’y unsa man nga nahibaloan; usa ka dili-makita nga poste nga ilang ginaampoan, nga wala gyu’y pulos. Usa ra sila ka pundok sa mga panatiko. Ug usa ra pud sila ka pundok sa mga ulipon. Ug gipasagdan lang sila sa ilang Dios nga mamahimong mga ulipon, nagpamatuod ra gyud nga Siya’y dili Dios.”

⁹⁶ Ug dinha mismo sa taliwala niining tibuok butang, gipatungha Niya ang mao mismong tawo. Namuhat ang Dios og mga butang sa ingon ka talagsaon nga mga pamaagi, didto mismo sa taliwala nila. Dili nga usa ka teologo, dili usa ka magtutudlo, dili usa ka pari, og dili nga usa sa ilang balaan nga mga kalalaken-an; kondili usa lamang ka ordinaryo nga tawo, nga natawo alang sa maong buluhaton. Ug gitawag siya sa Dios nga mamahimong Iyang propeta, ug gipadala siya didto. Ug wala siya'y gigunitan og bisan unsa man gawas sa usa ra ka balikong nga sungkod, aron atubangon ang usa ka kasundalohan, demakina nga mga yunit nga mibuntog sa tibuok kalibutan. Apan pinaagi niadtong sungkod nga anaa sa iyang kamot, ingon nga gisultihan siya sa Dios nga gunitan niya lang kadtong sungkod ug mapahigawas niya ang Israel, ug miadto siya ug nabuhay niya kadto tungod kay gisaad na man sa Dios kadto. Unsaon man niya sa pagbuhat niini? "Ako magauban kanimo."

⁹⁷ Ingon siya, "Ipakita kanako ang Imong himaya, Ginoo. Mahinay ako nga mamulong. Dili ako makasulti og husto. Ug ako . . ." Aduna siya'y minilyon nga mga pasumangil.

⁹⁸ Apan ang ingon Niya, "Ako magauban kanimo." Ug mao lang kadto ang kinahanglan. Miadto siya, nga dala ang Pulong sa Dios. Bisan unsa pa tingali ka delikado ang maong tahas, padayon lang si Moises nga mitoo sa Dios. Ug gipamatud-an sa Dios ang Iyang Pulong, pinaagi ni Moises, ingon nga mao ang kamatuoran. Tungod kay, bisan unsa pa ang nahitabo, mipabilin si Moises diha mismo sa Pulong. Niadtong panahon na sa panaw . . .

⁹⁹ Gisultihan sila sa Dios, didto sa Egipto, usab, nga Iyang ipahigawas sila, "Paingon ngadto sa yutang saad, usa ka maayong yuta, nga puno sa gatas ug dugos." Ug atua gayud kini didto. Wala sila kahibalo kung atua ba gyud kini didto, apan miingon Siya, "Anaa kini didto, ug gihatag Ko na kini kaninyo. Inyoha na kini, adto-i lang ninyo kini ug angkona!"

¹⁰⁰ Ug sa didto na sa kamingawan, sa diha nga daghan kanila ang atua didto, nga nanagsayaw diha sa Espiritu, nga ginapatugtog ni Miriam ang tamborin; nanagpangaon sila og manna nga gikan sa Langit; naminaw kang Moises nga nagaawit diha sa Espiritu; og nakita ang mga milagro ug mga ilhanan nga nagakahitabo. Apan pag-abot na sa pagpakigsangka, aron toohan ang tibuok Pulong sa Dios, og ang tanang saad, nangapakyas gyud sila.

¹⁰¹ Duha lang kanila ang mitoo niini, nga mao si Josue ug si Caleb. Ug dala nila ang ebidensiya nga maayo gayud ang yuta.

¹⁰² Apan, tungod sa mga kahintang, mao kadto ang nagbabag kanila. Tungod kay, ang ingon nila, "Dili nato arang maangkon kana nga yuta, tungod nga kinutaan man ang ilang mga siyudad, atua pa gyud ang ilang—ilang—ilang mga delegado. Dili

ang ilang mga delegado, kondili ang ilang—ilang mga tawong pagkadagku nga mga higante. Aba, mora lang kita og mga dulong kon tan-awon, pag itapad kanila.”

¹⁰³ Miingon si Josue ug si Caleb, “Labi pang may kasarang kita nga kuhaon kana.” Ngano man? Gihatag na man kadto sa Dios kanila, bisan unsa pa kadagku ang mga higante didto. Balewala ang babag para kanila. Gisulti na man gud sa Dios! Ug gipamatud-an kadto sa Dios pinaagi kanila. Ug nangadto sila ug nakuha gyud nila ang yuta, sama sa gikasulti na sa Dios nga mahimo nila kadto. Iyang gipamatud-an kini ngadto kanila.

¹⁰⁴ Karon, sa pag-adto nila didto sa bulan sa Abril, sa diha nga nagaagay ang tubig gikan sa mga kabukiran, gumikan sa pinadpad nga mga niyebe, ug uban pa, ug daw sa ang Dios dili gyud maayo nga heneral, sa pagpanguna sa Iyang mga kasundalohan paingon ngadto mismo sa usa ka dapit, Iya hinoon silang gikulong aron dili makapadayon ngadto sa yutang saad. Ug sa mismong panahon nga patabukon na Niya sila, nga patabukon na unta ngadto sa pikas, kadto pa hinoon ang pinakadili-maayo nga bulan sa tuig. Kadto ang bulan mismo nga ang tubig sa Jordan nagalapaw sa mga tampi niini, nga nagaawas paingon ngadto sa mga kaumahan. Aba, kung motabok man sila, kinahanglan unta nga ting-init, aron nga puede ra silang mag-ubog patabok. Apan mora og naghulat pa ang Dios nga magkalalum pa ang tubig. Gusto Niya lang ipakita nga Dios Siya. Gusto Niyang pamatud-an ang Iyang Pulong, bisan unsa pa’y mahitabo.

¹⁰⁵ Dili igsapayan kon miingon man ang doktor, “Mamatay ka na tungod sa sakit nga kanser.” Mao lang kana ang nahibaloan sa tawo. Halawum man ang tubig para sa uban kaninyo, karong gabhiona. Apan, timan-i, nagsaad ang Dios. Ginatuman sa Dios ang Iyang Pulong, ug ginapamatud-an sa Dios ang Iyang Pulong. Kini mao ang Kamatuoran.

¹⁰⁶ Naghulat pa ang Dios hangtud nga nahimo nang lapokon ang mga tubig, hangtud nga nagkalalum na kini ug lagpas na sa ilang mga ulo, ug uban pa, ug didto pa Niya giablihan ang dalan. Nag-una Siya kanila ug naghimo Siya’g paagi.

¹⁰⁷ Unsaon kaha nila pagpakasulod, didto sa Jerico, sa dihang bug-os man kining gisirad-an? Gihunahuna kadto ni Josue. Pero nasayod siya nga gipangunahan siya sa Dios hangtud niadtong puntoha, mao nga ang sunod nga lakang iya gihapon sa Dios.

¹⁰⁸ Usa niadto ka adlaw, sa dihang atua siya nagalakaw sa palibot, nagatan-aw sa mga paril, may usa ka Tawo siyang nakita nga nagatindog nga bitbit ang espada Niini. Ug gihulbot niya ang iyang espada ug miduol aron himamaton ang maong Tawo, ingon niya, “Kang kinsa Ka ba dapig? Kadapig ba Ikaw namo o kadapig Ikaw sa among kaaway?”

109 Miingon Siya, “Ako mao ang Pangulo sa panon sa kasundalohan sa Ginoo.” Ug gisultihan siya Niini kung unsay pagabuhaton. Unsaon man niya pagpatingog sa trumpeta ug mahugno na ang paril, nga mahimo kono nila ang pagpadagan og karwahi palahus niini? Unsa ma’y kahilambigitan sa usa ka trumpeta?

110 Nagagamit ang Dios og ingon-niana ka yanong mga pamaagi. Busa, tungod sa kayano niini, mao ang nakapahimo niini nga iya sa Dios para kanako. Kanunay kitang nagapaninguha nga makakaplag og usa ka dakung butang, aron makabuhat og unsa man nga butang, ug ang Dios... nga pagadumalan ang maong tibuok butang sa usa ka bantugang organisasyon ug klarong pasimangon lang kini. Nga unta, nagagamit man ang Dios og usa ka simple ra nga tawo, usa lamang ka tawo nga mahimo Niyang gunitan sa Iyang mga kamot, ug mapamatud-an na Niya ang matag Pulong nga Iyang gisulti, pinaagi Niini. Nagagamit gayud Siya sa ingon ka yano og gagmay’ng mga pamaagi!

111 “Patingugon ang trumpeta.” Dili nga kaloton ang paril, kondili, “Patingugon lang ang trumpeta, ug mangahugno na ang mga paril. Ang tingog sa trumpeta mao’y magpahugno sa mga paril.” Daw sa unsa ka hangal para sa karnal nga panghunahuna! Apan gipamatud-an gyud sa Dios nga ang Iyang Pulong tinuod, tungod nangahugno man ang mga paril, nangapatong-patong ang usa ibabaw sa usa pa. Diretso silang nakasulod ug naangkon nila ang siyudad.

112 Oh, gusto sa Dios nga pamatud-an ang Iyang Kaugalingon ingon nga Dios! Nasayod si Josue niana. Usa niadto ka adlaw, ug sa nagtindog siya didto, usa kadto sa pinakadakung dilimatohan nga nahitabo, gawas sa kamatayon, paglubong, ug pagkabanhaw ni Jesus Cristo. Sa diha nga ang kaaway... Naparot na niya ang kaaway, ug ang uban sa ilang mga kasundalohan nangalagiw na sa mga kabukiran. Naparot na niya sila, ug pasalop na ang adlaw niadto. Oh, grabe, pagkamahimayaon nga panahon kadto para kang Heneral Josue!

113 Hinumdumi, nga nagpakig-away siya para niadtong yutaa, nga wala ni usa ka ospital, usa ka nars, usa ka paunanghinabang nga bendahe, o usa man lang ka nasamdan nga sundalo. Sultihi ko ninyo kung duna pa’y butang nga makalupig niana. Oo, sir. Wala man lang siya og mga ospital, walay mga nars, ug wala gyud siya’y sundalo nga namatay, basta naglakaw lang sila diha sa kabubut-on ug sa Pulong sa Ginoo. Gipamatud-an gyud sa Dios nga nagauban Siya kanila. Husto kana. Matikdi n’yo karon.

114 Ug hingsayran nato nga nasayod si Josue, nga kung mogabii na, makaikyas gyud sila ug magkitaay ang usa’g usa, ug—ug

matigum nila ang ilang kaugalingon ug makahimo na usab og usa ka dakung hugpong sa kasundalohan, ug siguradong magkalisud na siya sa pagpakig-away kanila pagkasunod adlaw. Wala na siya mahibalo kung unsay buhaton, busa mihangad siya sa Dios. Nagkinahanglan na siya og tabang, ug kinahanglan nga mapahunong usà niya ang adlaw. Busa basta niya na lang gimandoan ang adlaw nga mohunong, ug ang . . . giingnan “ang bulan nga magpabilin sa Ajalon,” og dili molihok hangtud nga mandoan na niya kini. Ug mihunong ang bulan ug ang adlaw sulod sa baynte-kuwatro ka oras, samtang nagpakig-away pa si Josue sa maong gubat ug gibuntog ang mga kaaway, tungod atua man siya kaniadto sa linya sa pangatungdanan. Aduna siya’y katungod nga buhaton kadto, tungod kay gituman man niya ang sugo sa Dios.

115 Ug basta anaa ka lang sa linya sa pangatungdanan, nga ginatuman ang Pulong sa Dios, ginabuhat kung unsa lang ang gikasulti Niya nga imong buhaton, og nagamartsa sumala sa mga sugo sa Dios, aduna ka gyu’y katungod nga moingon nianang bukid, “Bumalhin ka!”

116 Ginatuman sa Dios ang Iyang Pulong. “Kung magaingon ka niining bukid, ‘Bumalhin ka,’ og dili magduhaduha sa imong kasingkasing, kondili toohan nga mamatuman gayud kanang unsa ma’y imong giingon, maangkon mo kanang unsay imong giingon.” Gisulti kana ni Jesus, sa San Marcos 11:22. Kamatuoran kana. Kahibalo ko nga Kamatuoran kana. Pulong Kini sa Dios, ug nagapamatuod lang nga Kamatuoran kini. Mahadlok lang gyud ’ta usahay. Nagaabot kita sa usa ka punto, nga mahadlok kita nga basin dili Niya tumanon kana nga Pulong. Pagatumanon Niya kana nga Pulong. Gisulti na Niya nga buhaton Niya kini. Karon, hingsayran nato nga tinuod gyud kana. Gipamatud-an man Niya kini.

117 Ang propesiya ni Isaias, usa niadto ka higayon, nga usa ka butang nga wala pa gayud nahitabo; wala nahitabo kaniadto, ug wala gyud nahitabo sukad. Ingon siya, “Usa ka ulay ang manamkon.” Mahunahuna n’yo ba ang usa ka babaye, nga walay pagpakighilawas sa usa ka lalaki, nga manganak? Miingon si Isaias, “Usa ka ulay ang manamkon.”

118 Ug gihimo mismo sa Dios nga magsamkon ang usa ka ulay, aron pamatud-an nga ang Iyang Pulong kamatuoran. Gipamatud-an Niya ang Iyang Pulong, tungod kay nanamkon man ang usa ka ulay ug gipanganak niini ang maong Anak.

119 Karon, kanang Pulong nga nahimong unod, tan-awa n’yo kung unsay gibuhat Niini. Sa diha nga mitungha na kana nga Anak, Siya mao ang Pulong Mismo. “Sa sinugdan mao na ang Pulong, ug ang Pulong kauban sa Dios, ug ang Dios mao ang Pulong. Ug ang Pulong nahimong unod ug nagpuyo ipon kanato.”

¹²⁰ Siya mao kanang buhi nga Pulong. Gipamatud-an Niya nga Siya mao kanang buhi nga Pulong. Ngani giingnan Niya ang mga magtutudlo kaniadto nga panahon, “Kinsa ba ang makahukom Kanako og silot tungod sa sala?” Ang *sala* mao’y “dili-pagtoo.” “Kinsa ba ang makasulti Kanako nga usa Ako ka dili-magtotoo? Ang matag Pulong nga gikasulat mahitungod Kanako, natuman na.” Ang pito ka kaulahiing mga panagna mahitungod sa Iyang kinabuhi natuman kini sa kaulahiing pito ka mga oras, didto sa krus. Ang tanan nga gikasulat bahin Kaniya, natuman gayud, tungod Siya man ang Pulong. Gipamatud-an Niya nga Siya mao gayud, kadto. Iyang giayo ang mga masakiton. Iyang gibanhaw ang mga patay. Gibuntog pud Niya ang kamatayon, impiyerno, ug ang lubnganan. Gipamatud-an Niya nga Siya mao ang Pulong.

¹²¹ Matikdi n’yo kining panghitabo kaniadto sa panimalay ni Jairo. Siya’y . . . Iyang gisultihan sila sa kamatuoran. Makita nato Siya sa dihag mitabok Siya sa dagat. Misakay Siya.

¹²² Adunay usa ka luoy’ng babaye didto sa bungtod, nga nagasto na ang tanan niyang salapi ngadto sa mga doktor. Walay pagduhaduha, nga nabuhat na sa mga mananambal ang tanan-tanan nga nahibaloan nila nga buhaton, aron nga maayo ang maong babaye; siguro sila’y Hebreohanon nga mga mananambal, ug usa pud kadto ka Hebreohanong babaye, busa gibuhay gyud nila ang tanan nga mahimo nila para sa ilang igsoong babaye. Bisan pa, wala sila’y unsa man aron mapahunong kining talinugo, nga, tingali, nagka-menopos na siya ug mibuhagay sa gihapon ang iyang dugo hangtud nga siya . . . naluya na kaayo ang luoy’ng babaye nga dili na siya halos makalakaw. Ug nadungog niya ang mahitungod kang Jesus. Ug sa nakita niya ang gamay’ng sakayan nga midungog ngadto sa may mga kahoy’ng willow, milugsong siya aron hibaloan kini.

¹²³ Daghan sa mga kritiko ni Jesus ang atua pud didto. Ug aduna Siya’y mga kritiko sa gihapon hangtud sa karon. Kung nailhan lang unta nila kung Kinsa Siya, dili unta sila mamahimong Iyang mga kritiko. Apan sila’y mga kritiko Niya tungod kay wala man sila nakaila kung Kinsa Siya.

¹²⁴ Ug ingon niana usab sa Mensahe karong panahona, pagkadaghang maayo nga mga kalalaken-an ug mga kababayen-an ang nanagsaway Niini tungod kay wala man sila kahibalo kung unsa Kini.

¹²⁵ Miingon si Jesus, “Kung nakaila kamo kang Moises, nakaila unta kamo Kanako. Naghisgot man si Moises mahitungod Kanako. Daghang mga halangdong tawo ang nangandoy nga makasaksi niini nga adlaw. Kung wala Ko ginabuhay ang mga buhat sa Akong Amahan, kung ingon-ana ayaw Ko ninyo tohi. Ang pagpamatuod nga Akong gibatonan,” ang ingon Niya, “labi pang daku kay sa kang Juan, kay ang mga buhat nga Akong

ginabuhat, nagapamatuod nga ang Amahan anaa uban Kanako.” Aduna Siya’y labi pang daku nga mga buhat, tungod kay Siya man ang Gipaila. Gipaila man usab si Juan, ingon nga usa ka tingog nga nagasinggit sa kamingawan. Apan sa dihang miabot na si Jesus, Siya mao ang propeta nga gikaingon na ni Moises nga motungha.

¹²⁶ Sama sa gikasulti ko na niadtong miaging gabii, mianhi Siya sa tulo ka ngalan; sa ngalan sa Anak sa Dios, Anak sa tawo, ug Anak ni David.

¹²⁷ Sa kaniadtong ania pa Siya dinhi sa yuta, sa unang higayon, Siya mao ang Anak sa tawo. Dili man Siya puedeng mahimong Anak sa Dios kaniadto; wala usab Niya giangkong ang ingon-niana. Ingon Niya nga Siya mao ang “Anak sa tawo.” Pag aduna ma’y mangutana Kaniya, ang ingon Niya, “Makita ninyo ang Anak sa tawo; ang Anak sa tawo.” Karon, ang “Anak sa tawo” mao’y usa ka *propeta*. Kinahanglan nga moabot Siya sa ingon-ana nga paagi, tungod, ang Kasulatan, dili Siya puedeng moabot nga sukwahi sa Kasulatan.

¹²⁸ Mao kana kon nganong, sa karon, nga ang atong—atong Mensahe sa niining panahon dili mahimong moabot pinaagi sa mga teologo ug teolohiya, kinahanglan nga mosubay kini sa mao mismong butang nga gikasaad niini nga buhaton. Kinahanglan sa ingon niana gyud nga paagi.

¹²⁹ Busa nahibaloan nato nga, sa niini nga Tawo, Siya’y kinahanglan nga mahimong usa ka propeta. Dili nga Anak sa Dios kaniadto, Siya’y kinahanglan nga mahimong Anak sa tawo. Gitawag ni Jehovah Mismo ang mga propeta’ng, si Jeremias ug sila nga, “Anak sa tawo.” “Sa diha nga makita na ninyo ang Anak sa tawo. . . .” “Kinsa ba ang Anak sa tawo?” sige sila og pangutana.

¹³⁰ Dayon, gipamuhat Niya ang Iyang katungdanan ingon nga Anak sa tawo. Dayon ginabuhat Niya ang Iyang katungdanan karon ingon nga Anak sa Dios. Ang Dios usa ka Espiritu, ug sa karon nagapamuhat Siya sa tanang mga Kapanahonan sa Iglesia, ingon nga Anak sa Dios. Karon, diha sa Milenyum, Siya’y mamahimong Anak ni David, pag molingkod na Siya sa trono ni David. Siya’y manununod sa maong trono, ingon nga Anak ni David. Anak sa tawo, Anak sa Dios, Anak ni David, ug mao ra kini nga Tawo sa tanang panahon.

¹³¹ Sama ra sa Amahan, Anak, ug Espiritu Santo; nga opisina sa Dios. Siya mao ang Dios nga Amahan kaniadto, dayon nahimo Siyang Dios nga Anak, karon Siya ang Dios nga Espiritu Santo. Dili nga tulo ka mga Dios; usa ra ka Dios, tulo lang ka kapadayagan, tulo ka mga kinaiyahan sa mao ra nga Dios.

¹³² Karon atong nahibaloan, ug sa niining panahon nga atong gikinabuhian, nga ginatuman sa Dios ang Iyang Pulong sa mao gihapong paagi nga gibuhat Niya kaniadto.

¹³³ Hingsayran nato nga mitabok Siya sa dagat. Mitoo kining maong babaye Kaniya, og aduna gyu'y sa kung unsa mang butang sa sulod sa babaye nga nagapitik. Wala man siya'y Kasulatan para niini, sama lang ni Josue nga wala pu'y Kasulatan nga kinahanglang pahunongon ang adlaw, apan mitoo gyud siya sulod sa iyang kasingkasing nga si Jesus mao ang Anak sa Dios. Busa miingon siya, "Kung makahikap lang ko sa Iyang bisti, mamaayo gayud ako." Busa midutdot siya sa taliwala sa kadaghanan hangtud nga nahikap gyud sa maong babaye ang Iyang bisti, ug mitang-on na ang talinugo niini.

¹³⁴ Karon, mitan-aw Siya ngadto sa mga mananambong, aron hibaloon kung kinsa ang mihikap Kaniya. Sa walay pagduhaduha, aduna gyu'y nakahikap. Mihunong Siya. Gipalibotan Siya sa tanang mga tawo; ug ang uban nagbiay-biay Kaniya, ginakataw-an pud Siya sa uban; atua usab ang mga pari nga nanagtindog ug nagapangutana Kaniya, ug ang mga ministro, ug uban pa. Apan aduna usab didto og pipila nga mitoo Kaniya. Ug, ug pagkataud-taud mihunong Siya, sa kalit lang, milingi, og miingon, "Kinsay mihikap Kanako?"

¹³⁵ Miingon ang uban kanila, "Aba, Magtutudlo!" Nagatoo ko nga si Pedro kadtong miingon, "Aba, nagapalibot baya ang tanan nga mga tawo Kanimo. Bueno, kinsa man diay ang 'mihikap' Kanimo? Aba, ang tanan nagahikap man Kanimo!"

¹³⁶ Ingon Siya, "Apan gibati Ko nga may gahum nga migula Kanako." Naluya man Siya. Lahi gyud kadto nga matang sa paghikap.

¹³⁷ Kung makita lang unta nato kana, igsoong lalaki, igsoong babaye! Kung mahikap lang ninyo Siya pinaagi nianang matang sa paghikap! Oh, mga tawong masakiton, nagaandam na ko aron iampo kamo, sa pipila na lang ka gutlo. Nagatoo ko nga aduna ko'y Balaang Espiritu, nga mao rang Balaang Espiritu nga aduna kaninyo mismo, nga aduna usab niining mga kalalaken-an dinhi. Mao rang Balaang Espiritu, apan usa kini ka sugo sa Dios; ug kung toohan lang ninyo kana ingon nga sugo sa Dios, ang pag-ampo para sa mga may sakit, ug pagpandong og mga kamot diha kanila, ug paghingilin sa dautang mga espiritu, ug ang mga saad nga Iyang gihimo, mahitabo ang mao gihapong butang diha kaninyo. Maangkon ninyo ang inyong ginahangyo, kung mahimo ninyong toohan kini.

"Mahimo mo bang toohan nga arang Kong mabuhat kini?" ang ingon ni Jesus.

¹³⁸ "Oo, Ginoo, nagatoo ako," ang ingon sa tawong may anak nga adunay epilepsy, "Nagatoo ko nga Ikaw mao ang Anak sa Dios nga moanhi sa kalibutan." Karon, nasayod kita nga mao lang kana nga taras ang gikinahanglan nga makapahimo og mga resulta.

¹³⁹ Karon, sa kadali, atong pamalandungon Siya sa makadiyut, nga atua Siya nagalakaw. Usa ka gamay'ng sacerdote ang miduol, walay pagduhaduha nga usa ra kadto ka hangtud utlanan lang nga magtotoo.

¹⁴⁰ Pagkadaghan kaayo og mga ingon-niini sa kalibutan karong panahona, makaluluoy'ng hangtud utlanan lang nga mga magtotoo. Gusto man usab nilang toohan Kana. Gusto nilang toohan nga tinuod ang Espiritu Santo. Gusto nilang toohan nga mao kini ang apostolikanhong kalihokan, maingon sa gikasaad na sa Dios sa kaulahiang mga adlaw nga igabubo Niya ang Iyang Espiritu. Kita . . .gusto pud niyang toohan ang Malaquias 4, nga Iyang gisaad, sa kaulahiang mga adlaw nga ipasig-uli ang—ang orihinal nga pentecostal nga Tinoohan balik ngadto sa—ngadto sa iglesia pag-usab.

¹⁴¹ Nagapamahayag niini ang Malaquias 4. “Ania karon, Akong ipadala kaninyo si Elias sa kaulahiang adlaw,” husto kana, “ug iyang ipasig-uli ang Pagtoo sa mga anak balik ngadto sa mga amahan pag-usab,” kita n’yo, “ang Pagtoo sa mga amahan ngadto sa mga anak, usab.” Kita n’yo, mamahitabo kini.

Moingon mo, “Bueno, si Juan Bautista man kana.” Dili, dili.

¹⁴² Si Juan Bautista mao ang Malaquias 3. Husto kana. Ingon niana ang ginaingon sa Mateo 11, “Kung makadawat kamo niini, kini siya mao ang gihisgotan nga, “Tan-awa, Akong ipadala ang Akong mensahero sa atubangan Ko.” Si Elias kadto, sigurado gayud. Mao kana’y giingon ni Jesus. Apan dili ang Elias sa Malaquias 4, bisan pa man.

¹⁴³ Tungod kay, “Sa dihadiha nga mahuman kana nga Mensahe, pagasunugon na ang kalibutan pinaagi og kalayo, ug ang mga matarung magalakaw ibabaw sa mga abo sa mga dautan.” Busa wala gayud kini nahitabo sa panahon ni Juan. Mao nga kinahanglan natong magkaaduna og usa ka Mensahe nga magakaylap og magpahigawas sa mga tawo gikan sa tanan niining denominasyong mga kahimtang, pabalik ngadto sa orihinal, og tinuod nga pentecostal nga Tinoohan. Ug atong makita kini, nga mao’y katumanan sa Kasulatan nga kinahanglan gyud mahitabo. Ang tibuok Kasulatan kinahanglan nga mamatuman. Pagkadaghan pa unta niana ang mahimo natong maaplikar, pero magkinahanglan pa ko og taas-taas nga oras kay sa akong oras karon, aron ipakita kini. Apan nasabtan na man ninyo kining mga butanga, nga mamahitabo kini nga eksaktong sama gayud niini, ngadto sa mga anak ni Abraham, sumala sa gikasaad na Niya.

¹⁴⁴ Makita nato si Jesus nga nagapadulong na kaniadto aron ayohon ang gamay'ng dalagita. Tungod nga, ang maong amahan, ang luoy'ng hangtud utlanan lang nga magtotoo, may sa kung unsang butang nga miabot siya sa punto nga kinahanglan na niyang ilhon si Jesus, tungod kay, gisurender na man sa doktor

ang maong dalagita. Ug gisul-ob niya ang iyang gamay'ng itum nga kalo ug milakaw aron hibaloon kung makaplagan ba kaha niya si Jesus. Kita n'yo, Siya anaa ra sa kanunay dinha mismo pag gusto ninyo Siya nga pangitaon. Nakaplagan niya Siya nga bag-ohay lang miabot sa baybayon.

¹⁴⁵ Ug miingon ang maong amahan, “Adtoi ang anak kong babaye, pandongi siya sa Imong mga kamot, ug mamaayo gayud siya.” Miingon, “Atua siya nagahigda nga naghimalatyon na. Siya’y bugtong nako nga anak.” Ingon pa, “Dose anyos pa ang iyang panuigon. Wala na kami’y uban pang anak. Ako ug ang akong asawa,” tingali’g, “nagakatigulang na kami. Ug mao lang kini ang bugtong namong anak, ug nagahigda pa gyud siya nga naghimalatyon na. Ginoo, nagatoo ako Kanimo. Kung moadto Ka lang og pandongan Mo siya sa Imong mga kamot, mamaayo gayud siya.”

¹⁴⁶ Kita n'yo, unsa ma’y iyang naila? Naila niya nga kadtong gisaad nga Pulong sa Dios nadayag diha niini nga Tawo.

¹⁴⁷ Sama ra sa gikasulti ni Nicodemo, “Rabbi, magtutudlo, nasayod kami nga usa Ikaw ka magtutudlo nga nagagikan sa Dios. Nasayod kami niini. Nasayod ang mga Fariseo niini.” Nganong wala man nila gisugid kadto? “Walay tawong makabuhat sa mga butang nga Imong gipangbuhat, gawas lamang kon ang Dios anaa uban Kaniya. Nasayod kami nga nagagikan Ikaw sa Dios.”

¹⁴⁸ Mahibaloan nato dinhi nga mitoo si Jairo sa mao gihapong butang. Ingon siya, “Adto Ka og ipandong ang Imong kamot.” Nahibalo man siya nga ang Dios anaa kang Jesus. “Pandongi sa Imong mga kamot ang akong anak. Bisan naghimalatyon na siya, mabuhi gayud siya.”

¹⁴⁹ Miadto Siya uban kaniya. Ug samtang nagpadulong na ang amahan, dihay misugat nga usa ka mensahero, ug miingon, “Ayaw na Siya hasola, ayaw na hasola pa ang Magtutudlo. Ang—ang imong batang babaye, patay na, mitaliwan na siya karon. Patay na siya.”

¹⁵⁰ Milingi si Jesus ngadto kang Jairo, miingon, “Dili ba giingon Ko na kanimo, ‘Kung motoo ka lang, makita mo ang himaya sa Dios’? Kung toohan mo lang gyud kini!”

¹⁵¹ Misulod ang amahan sa iyang balay, ug atua silang, tanan nga nanagbakho ug nanaghilak, ug nanagdanguyngoy, sama ra sa buhaton sa bisan kinsang tawo. Usa ka buutang batang babaye, nga anak og pastor, ang namatay na, ug gikuha na siya gikan niining kalibutana. Ug tingali’g pipila na ka oras nga patay ang maong dalagita, ug dayon gipahimutang na nila siya sa higdaanan, ug giandam na aron embalsamahon ang lawas niini, siguro, ug aron ilubong na, ug masulod na sa lubnganan.

¹⁵² Dayon nahibaloan pud nato nga misulod si Jesus sa maong balay. Nanagdanguyngoy na silang tanan. Ingon Niya,

“Magmahilum kamo.” Ingon pa Niya, “Dili siya patay, kondili nahikatulog ra siya.”

¹⁵³ Karon mahunahuna ba ninyo kung unsay gihunahuna nila kaniadto? “Aba, kaila na mi niining tawhana, baya. Nahibalo kami nga usa Siya ka ilehitimo nga anak. Ug nadungog na namo Siya, ang tanan mahitungod sa Iyang walay-pulos nga mga panagna nga Iyang ginahimo. Ug karon nahibalo na mi nga husto gyud diay ang sacerdote nga, ‘buangbuang ang maong tawo,’ kay nahibalo man mi nga patay na ang dalagita. Miingon na gani ang doktor nga siya’y ‘patay na,’ ug naghigda na siya dinha. Mitaliwan na siya, ug nahibalo kami nga patay na siya.” Ang ingon nila, nga nangatawa kono sila sa pagbiaybiay Kaniya, sa laing pagkasulti, gipakaulawan Siya, pinaagi sa pagpanaway Kaniya.

¹⁵⁴ Apan human na Niyang giingon nga dili patay ang maong dalaga. Mao lang kadto ang gikinahanglan. “Nahikatulog ra siya.” Bisan unsa pa kadaghan ang mga kritiko, pamatud-an gyud Niya ang Iyang Pulong! Gipagawas Niya silang tanan sa panimalay, gipagawas ang tanang mga dili-magtotoo. Gipasulod sila Pedro, si Santiago, ug si Juan, ang mga magtotoo, ang tulo ka mga saksi, ug ang amahan ug inahan usab, ug gigunitan sa kamot ang batang babaye, ug nagsulti sa usa ka pinulongan nga nagtawag sa kalag niini pabalik gikan sa kung asa man didto sa Eternidad. Ug nabuhi ang batang babaye.

¹⁵⁵ Unsa ma’y gibuhat Niya? Gipamatud-an Niya ang Iyang Pulong. Gipamatud-an Niya kung unsa ma’y Iyang gisulti. Nga dili patay ang maong dalagita. Nahikatulog ra kini. Karon hingsayran nato, nga tungod niini, atong naamgo, nga Iyang gipamatud-an ang usa pa ka butang didto. Bueno gipamatud-an Niya nga Dios Siya. Gipamatud-an Niya nga aduna Siya’y pagkahibalo-nang-daan. Matikdi ninyo kung unsay giingon sa Iyang Pulong karon. “Dili siya patay, kondili nahikatulog ra siya.” Kita n’yo, ingon Niya nga dili patay ang dalaga, una pa lang. Nahikatulog ra kini. Iya lang gipakita ang Iyang pagkahibalo-nang-daan. Karon, tingali’g aduna usab og daghang mga dalaga ang namatay niadtong mao ra nga buntag, apan kining usa dili siya patay. Nahikatulog ra siya, sama ni Lazarus kaniadto. Ug gitawag Niya siya gikan niadtong nga pagkatulog, tungod kay dili man siya patay.

¹⁵⁶ “Ug ang nagatoo Kanako, bisan siya mamatay, mabuhi siya; ug ang tanan nga buhi ug nagatoo Kanako, dili na gayud mamatay.” Ang kadto lamang mga anaa na sa Basahon sa Kinabuhi sa Cordero, nga Iyang gitubos sa dihang namatay Siya, mao ra kana ang Iyang pagatawgon gikan niana nga pagkatulog, sa nianang adlaw, kadtong mga gipangbuhi na pinaagi sa Iyang gahum, nga aduna na kanila kanang gahum nga nagahatag og kinabuhi. Gani sama sa gikaingon ko na kagabii; nga bisan patay na si Eliseo kaniadto, ug ang iyang mga bukog napahimutang na

sa lubnganan, kadtong gahum nga nagahatag og kinabuhi anaa ra gihapon sa iyang mga bukog.

¹⁵⁷ Oo, gipamatud-an Niya kung Kinsa Siya. Karon nahibaloan usab nato, sa mao gihapong paagi, gipamatud-an usab Niya, nga, sa Mga Hebreohanon sa ika-4 nga kapitulo ug sa ika-12 nga bersekulo, gipamatud-an Niya nga Siya mao ang Pulong sa Dios. Gipamatud-an gayud Niya. Matikdi ninyo kung unsay gibuhat Niya. Mga Hebreohanon, 12, nagaingon ang Mga Hebreohanon 4:12 nga, “Ang Pulong sa Dios mas gamhanan, mas maabtik kay sa espada nga duhay-sulab, ug—ug Kini usab usa ka Magtutugkad sa mga hunahuna ug sa mga katuyoan sa kasingkasing.” Matikdi n’yo sa makadiyut lang karon.

¹⁵⁸ Sa dihang misugod Siya una sa Iyang ministerio, human nga mitungha Siya aron ipakita nga Siya mao ang Pulong, sa dihang migula Siya gikan sa kamingawan human sa Iyang pagsulay, dihay usa ka lalaki nga ginganlan og Pedro, ang iyang ngalan kaniadto mao si Simon. Ug miduol siya kang Jesus uban ang iyang igsoon, nga si Andres. Ug sa diha nga miduol na siya ngadto sa Presensiya ni Jesus Cristo, miingon si Jesus, “Ang imong ngalan mao si Simon. Ug ang ngalan sa imong amahan mao si Jonas. Sukad karon pagatawgon ka na nga Pedro.” Nagpamatuod kadto nga Siya mao ang Pulong, tungod kay ang Pulong usa man ka Magtutugkad sa mga hunahuna ug mga katuyoan sa kasingkasing. Siya mao ang Pulong.

¹⁵⁹ Nakita usab ni Felipe nga nahitabo kini. Miadto dayon siya sa bukid, nga naabtan og usa ka adlaw, ug mibalik ra. Ug giuban niya ang iyang higala nga ginganla’g Natanael. Ug ingon siya, “Nagakahitabo na gayud kining mga butanga. Miingon si Moises ‘ang Ginoo nga atong Dios magpatindog og usa ka Propeta’ nga sama kaniya, ug ania na ang maong Tawo. Aba, giingnan Niya si Simon kung kinsa kini, og kung kinsa usab ang iyang amahan, ug nahibalo gyud ’ta nga ang Iyang ginaingon mao ang kamatuoran. Tungod kay, giingon na kini sa Dios diha sa Pulong, ug ania napamatud-an na kini nga Iyang pagabuhaton ang ingon-ana, ug nagapamatuod gyud nga kana mao ang Mesias.”

¹⁶⁰ Ug sa miduol na siya sa Iyang Presensiya, giingnan siya ni Jesus, ang ingon, “Tan-awa ang usa ka Israelinhon, nga kaniya walay limbong.”

¹⁶¹ Ingon siya, “Rabbi, kanus-a Mo man ako hiilhi?”

¹⁶² Giingnan siya, “Sa wala ka pa gitawag ni Felipe, sa didto ka pa ilalum sa kahoy, nakita Ko na ikaw.” Gipamatud-an Niya ang Iyang Pulong. Gipamatud-an Niya ang Pulong sa Dios. Gipamatud-an gyud Niya.

¹⁶³ Ang babaye didto sa atabay, sa dihang siya... Bueno, gihangyo Niya ang babaye nga painumon Siya og tubig gikan sa banga nga mao’y iyang gikalos og tubig gikan sa atabay, ug miingon kini, “Dili baya nabatasan kaninyo nga mga Judeo

ang pagpangayo kanamong mga babaye nga taga-Samaria og ingon-niana nga butang, tungod kay wala man kita'y pagpakigharong."

164 Ingon Siya, "Apan kung nasayod ka lang kung Kinsa ang imong gikaestorya, ikaw ang mangayo Kanako og mainom."

Ingon ang babaye, "Halawum man ang atabay."

165 Ug ang maong pag-estoryahanay, nagpadayon kadto, sa katapusan hingsayran Niya kung unsay problema niini. Ug ingon Siya, "Lakaw ug kuhaa ang imong bana, ug balik dinhi."

Miingon kini, "Wala man ko'y bana."

166 Ingon Siya, "Tinuod ang imong giingon, kay nagkaaduna man ka og lima, ug ang usa nga gikaipon mo karon dili man imong bana."

167 "Aba," ang ingon niini, "sir, naila ko nga Ikaw usa ka propeta." Iyang... "Wala pa kami nagkaaduna og usa sulod sa upat na ka gatus ka tuig, kabalo ka." Miingon, "Naila ko nga Ikaw usa ka propeta. Karon, nasayod kami nga pagmoabot na ang maong Mesias, nga gitawag og Cristo, pagmoabot na Siya, magasulti Siya kanamo sa ingon-niini nga matang sa mga butang. Mao kana ang Iyang ilhanan."

168 Sa pag-ingon Niya, "Ako mao Siya nga nagapakig-estorya kanimo," gipamatud-an Niya ang Iyang Pulong. Siya... ngani mapatud-an pud nato kung unsay Iyang gipamahayag. Siya mao ang Mesias, ang Anak sa Dios.

169 Karon nahibaloan nato, usab, nga kining luoy'ng babaye nga nagkaaduna niining talinugo, nga mihikap sa Iyang bisti, napamatud-an usab kadto kaniya nga si Jesus mao ang Pulong sa Dios.

170 Karon hinumdumi n'yo, karong gabhiona, nga miingon si Jesus... Usab, sa Mga Hebreohanon, 1, Mga Hebreohanon sa ika-3 nga kapitulo, nagatoo ko nga mao kini, miingon Siya, nga, "Siya sa karon usa ka Labaw'ng Sacerdote," sa niining kapanahonan nga atong gikinabuhian karon, "usa ka Labaw'ng Sacerdote nga nagalingkod sa Kahalangdon sa Dios, diha sa Kalangitan, nga arang matandog sa pagbati sa atong kaluyahon."

171 Miingon ang Mga Hebreohanon 13:8, "Siya mao sa gihapon kagahapon, karon, ug hangtud sa kahangturan." Siya ang mao gihapon nga Dios nga Mao ra kaniadto. Siya mao sa gihapon karong gabhiona.

172 San Juan 14:12, ingon Siya, "Ang nagatoo Kanako, ang mga buhat nga Akong ginabuhat pagabuhaton usab niya. Gani mas daghan pa niini ang pagabuhaton niya, kay Ako moadto sa Akong Amahan." Kita n'yo? "Ang nagatoo Kanako, kining mga buhat nga Akong ginabuhat pagabuhaton usab niya."

173 Sa Mateo 28 usab, ingon Siya, “Sa hamubo na lang nga panahon ug ang kalibutan dili na makakita Kanako, apan kamo makakita ra unya Kanako, kay Ako magauban kaninyo bisan sa katapusan sa kalibutan.”

174 Si Jesus Cristo mao sa gihapon kagahapon, karon, ug hangtud sa kahangturan. Ania Siya nagatindog, karong gabhiona, aron pamatud-an ang Iyang Pulong. (Tapos na ang akong oras.) Apan gipamatud-an Niya nga mahimo gyud Niya. Gipamatud-an Niya ang Iyang pulong kaniadto, kung unsa ma’y Iyang gisaad alang niadto nga panahon. Gipamatud-an Niya ang mga pulong ni Isaias. Gipamatud-an usab Niya ang mga pulong ni Noe. Gipamatud-an pud Niya ang mga pulong ni Moises. Gipamatud-an gyud Niya ang mga pulong sa matag usa sa mga propeta.

175 Ngani nagsaad man Siya nga sa niini nga panahon, sa panahon nga atong gikinabuhian karon, nga ang kalibutan maanaa na sa kahimtang sa Sodoma, sa mga bayot. Tan-awa lang ninyo kini sa kalibutan karong panahona, sa tibuok kalibutan kon diin ako nagabiyaha; dili lang dinhi, sa bisan asa gayud. Pagka-kritikal na gyud niini. Sa Sweden, ang mga batan-ong kalalaken-an ug mga batan-ong kababayen-an nagadula sila og skiing, nga mga hubo. Ug sila usab didto sa Germany ug sa France, ug sa bisan asa pa man, halos sama ra kini sa medyo tampalasan nga mga tawong aduna kita dinhi sa Estados Unidos. Usa kini ka panahon. Ako, kung makahigayon ko nga makabalik, gusto kong hisgotan ang pipila ka mga ma-propesiya nga mga butang, para kaninyo, aron ipakita kana kaninyo, ang panahon nga atong gikinabuhian. Miingon ang Biblia nga, “Pagadumalahan sa mga anak ang ilang mga ginikanan.”

176 [Blangko nga bahin sa teyp—Ed.] . . . Pulong.

177 Apan, hinumdumi ninyo, nga adunay binhi si Abraham, nga mao ang binhi nga si Isaac. Aduna siya’y uban pang mga binhi human nga namatay si Sarah. Ug siya’y usa ka gatus ug kuwarenta’y-singko na ang panuigon, nga nakigminyo siya sa usa na usab ka babaye, og nakabaton pa og pito ka anak nga mga lalaki gawas sa mga anak nga babaye, tungod kay gihimo man siyang usa ka batan-ong lalaki pag-usab sa Dios sa dihang usa ka gatus anyos na siya. Mibalik siya sa pagkakuwarenta’y-singko anyos lang, busa human nga siya . . . Nahibalo na kita niana. Giwali ko na kana kaninyo dinhi sa California, pipila na ka mga tuig ang milabay.

178 Ug karon nasabtan nato nga ang Binhi ni Abraham dili ang literal nga binhi sa pakighilawas pinaagi kang Sarah, nga mao si Isaac, nga nahimong usa ka nasud, kondili mao diay ang harianong Binhi pinaagi sa saad, nga mao si Jesus Cristo. Ug pinaagi niana nga Binhi, nagpatungha Siya og usa ka harianong Binhi. Oh, grabe! Karon usa kita ka harianong pagka-sacerdote,

usa ka harianong nasud, usa ka balaang nasud, nga nagahalad og mga pagdayeg sa Dios, ang halad sa atong mga ngabil nga nagahatag og pagdayeg sa Iyang Ngalan. Gipamatud-an gyud sa Dios ang Iyang Pulong, gibubo Niya ang Espiritu Santo nganhi kanato.

¹⁷⁹ Ingon Siya, “Maingon sa nahitabo kaniadto sa mga adlaw sa Sodoma, mao man usab ang mahitabo sa adlaw sa diha nga ginapadayag na ang Anak sa tawo.” Karon namatikdan ba ninyo? Gikan sa pagkahimong Anak sa Dios, sa wala pa Siya nahimong Anak ni David, ginapadayag Niya ang Iyang Kaugalingon pag-usab ingon nga Anak sa tawo. Namatikdan ba ninyo ang Kasulatan?

¹⁸⁰ Tungod, kanunay man Niyang ginabuhat kini, wala gayud Siya nagabuhat og unsa man gawas kon gipadayag na Niya kini ngadto sa Iyang mga alagad ang mga propeta. Eksakto gyud kana. Mao kana ang Iyang gisaad. Kita n’yo? Wala gayud Siya nagabuhat og unsa man. . . Dili makapamakak ang Dios. Kanunay gyud Niyang ginapahayag kini, una, sa dili pa Niya ginabuhat kini.

¹⁸¹ Tan-awa n’yo ang kahimtang nga atong gikahimutangan sa karon. Tan-awa n’yo kon hain na kita. Ang matag usa kaninyo moangkon gyud nga ania na ’ta sa usa ka moderno nga Sodoma. Ngani kabalo mo nga mas gilabwan pa kana sa niining nasud. Wala na sila’y paglaum pa. Wala na gyu’y kaluwasan nga nahibilin alang niini nga nasud o uban man nga nasud. Milagpas pa kita niana karon. Ang mga propesiya nga gipropesiya mahitungod niini, nangatuman na. Nagapangtapok na ang Dios, ginapasulod na kanang kaulahiing karnero sa bisan asa man kini. Mahitabo nga mapasulod na gyud silang tanan, usa niana ka adlaw. Ania na kita sa katapusang panahon. Tan-awa ninyo, nga nakahan-ay na gayud.

¹⁸² Hangyoon ko kamo, ingon sa usa ka igsoong lalaki o igsoong babaye, aron nga mapalig-on pa ang inyong pagtoo sa makadiyut lang sa dili pa ta mag-ampo alang niini nga mga tawo. Ug kahibalo ko nga dili nato kinahanglang manguli sa piho nga oras. Apan ako—ako—gusto ko nang sugdan ang linya sa pagpaampo, aron kamo nga kinahanglan nang manguli puede na pud mong manguli. Kita n’yo? Kamo nga gustong magpabilin pa diha sa linya sa pagpaampo mahimo ra pud mong magpabilin. Apan tugoti lang ko ninyo, ingon nga inyong igsoong lalaki, nga ipakita kaninyo ang usa ka butang sa makadiyut lang.

¹⁸³ Matikdi n’yo si Jesus, sa Lucas 17:30, kita n’yo, sa diha nga naghisgot Siya mahitungod sa katapusang panahon, kung unsa nga mahisama sila sa mga adlaw ni Noe kaniadto. Dayon miingon Siya, “Ug maingon, usab, sa mga adlaw sa Sodoma,” miingon, “sa diha nga ginapadayag na ang Anak sa tawo.” Ang Anak sa tawo na usab, dili nga Anak sa Dios. “Anak sa tawo,”

kita n'yo, ginahulagway niini pag-usab ang Malaquias 4, nga nagatakdo gayud. Ang tanang uban pa niini nga mga propesiya nga nagakahitabo na, kung sa unsang paagi nga mangatuman kini. Ginapamatud-an Niya ang Iyang Pulong sa mao ra gihapon. Husto kana.

¹⁸⁴ Ug himatikdi, tungod niini, kung unsa nga igabubo Niya ang Iyang Espiritu sa tanang unod, ug kung unsa ang magakahitabo, og kung unsa nga mahitabo na usab ang pagpasig-uli. “Ug magahimo’g propesiya ang inyong mga anak nga lalaki ug mga anak nga babaye. Ang Akong mga alagad nga babaye ug mga sulugoong babaye pagabuboan Ko sa Akong Espiritu. Ug igapakita Ko ang mga ilhanan sa itaas diha sa kalangitan.”

¹⁸⁵ Aduna ko’y retrato dinhi, ni Igsoong Lee Vayle dinhi. Gusto ko lang ipakita kaninyo kung unsay nahitabo didto sa bukid, niadtong miaging adlaw, sa diha nga gipapagawas ang tanang mga estudyante, sa wala pa kining dakung hilisgotanan mahitungod sa pag-abli, nianang Pito ka Mga Selyo. Sa diha nga gipagawas na ang mga estudyante, atua ako didto nga nagaampo, og dihay Kalayo nga nagaporma og imbudo nga nagapaubos, dayon mipaitaas na pud ug mikaylap, ug nagabiyo-biyo ug mipaubos na usab. Mao kadto ang Iyang giingon kung unsay igasulti sa mga tawo. Among . . . Mao Kini, kon diin ang mga eskwelahan didto sa Tucson . . . ug mipaingon Kini ngadto sa kawanangan.

¹⁸⁶ Ug nakakuha og mga retrato ang siyensiya, ug uban pa, ug nagsusi Niini. Ingon sila, “Hain na man Kini? Unsa ma’y nahitabo?” Wala nila mahisabti, kita n'yo. Oh, wala man unta kadto nahitabo nga diha ra sa usa ra ka kanto, aron lang mangitngitan ang ilang panabot. Kini wala gayud . . . Si Jesus, kaniadtong ania pa Siya, minilyon ka mga tawo ang wala gayud masayod nga ania diay Siya sa yuta. Oo. Aduna ma’y minilyon usab sa karon ang dili makasabot, napulo ka minilyon kanila.

¹⁸⁷ Apan aduna usab, nga alang Kanila gipadala Kini, sila’y makasabot gayud. “Ang mga makinaadmanon makaila sa ilang Dios niana nga adlaw, ug makakab-ot sila sa dagkung mga butang.” Naamgo nato nga kana, ang panahon nga atong gikinabuhian karon.

¹⁸⁸ Tan-awa n'yo ang Sodoma kaniadto, tan-awa n'yo kung unsay nahitabo. Siya miingon, “Maingon sa nahitabo kaniadto sa mga adlaw sa Sodoma.” Adunay usa ka pundok sa mga tawo ang nagapaabot alang sa usa ka gikasaad nga anak. Nagatoo kita niana. Kadto mao si Abraham ug ang iyang pundok. Aduna pud og usa ka dagaang nga pundok, ni Lot, nga medyo nag-backslide, bisan pa nga usa ka magtotoo; didto sa Sodoma. Tulo ka matang sa mga tawo.

¹⁸⁹ Aduna gyud sa kanunay kanang tulo ka matang sa mga tawo. Ang mga kaliwat ni Ham, Shem, ug ni Japhet. Usab, ang

mga magtotoo, mga nagpatoo-too, ug ang mga dili-magtotoo. Sila’y anaa sa bisan asa, ug atong—atong makaplagaan sila sa matag pundok. Ug, sa bisan asa, makaplagaan mo gayud sila. Ug ang ingon-niana nga mga pundok anaa karon sa gihapon. Kinahanglan mong mabal-an ang kalainan. Mahimo mo kana mismo nga subayon sa Kasulatan, nga nagakatakdo gyud kana.

¹⁹⁰ Paminawa kini. Tan-awa n’yo kon diin kita napahimutang, sumala sa pagkapuwesto ug sumala sa propesiya, niining gabhiona. Karon, ang matag usa kanato nasayod gayud nga ang kalibutan anaa na sa usa ka Sodomanhon nga kahimtang.

¹⁹¹ Hingsayran pud nato nga basi sa tanang mga propesiya mahitungod sa Israel, anaa na kini sa kaugalingong yuta niini. Kung gusto n’yong mahibaloan kung asa na kita karon basi sa pang-nasud nga paghibalo, tan-awa n’yo ang Israel, kung asa na kini.

¹⁹² Kung gusto n’yo usab mahibaloan kung unsa na ang kahimtang sa iglesia sa karon, tan-awa ninyo kung unsa na manglihok ang mga kababayen-an. Babaye man ang iglesia. Tan-awa n’yo ang mga babaye, imoral na kaayo, og pagkamahilas; matikdi, tan-awa n’yo kung asa na ba ang iglesia. Tan-awa lang ninyo kini, kita n’yo, kita n’yo, tan-awa lang ninyo ang mga kababayen-an. Makita ninyo kung asa, og daw sa unsa nga ang inyong mga kababayen-an ubos ug hugaw na kaayo, ingon na niana usab ang inyong iglesia, kita n’yo, ang maong tipo.

¹⁹³ Tan-awa ninyo kung asa na ang Israel, makita n’yo usab ang panahon kung asa na kita. Kita n’yo, tan-awa lang ninyo ang maong mga ilhanan ug mga katingalahan. Kung inyong—kung inyong, o kung buka ang inyong mga mata, makita gyud ninyo kung asa na kita.

¹⁹⁴ Karon tan-awa ninyo kung asa na kita mismo napahimutang, ang kalibutan anaa na sa Sodomanhon nga kahimtang. Karon matikdi, “Maingon sa nahitabo kaniadto.” Karon matikdi, adunay usa ka tawo, niadtong panahona, ang nagahulat alang sa usa ka gikasaad na nga anak nga umalabot. Si Abraham ug si Sarah, nagahulat sila kaniadto alang sa gikasaad nga anak diha sa grupo ni Abraham. Wala sila kaniadto sa Sodoma. Apan niadtong panahona, sa kaulahiing hugna sa maong panghitabo, sa wala pa miabot ang gikasaad nga anak, adunay tulo ka lalaki nga miabot gikan sa Langit, usa ka Manulonda . . . duha ka Manulonda ug ang Dios. Ug mikanaug sila ug nagpakig-estorya kang Abraham, ilalum sa kahoy’ng encina. Husto ba kana? [Nagaingon ang kongregasyon, “Amen!”—Ed.] Ug duha kanila ang miadto sa Sodoma ug nagsinggit batok sa mga kasalanan sa maong siyudad. Ug nahitabo kadto sa wala pa ang pagsunog sa kalibutan sa Gentil, niadtong panahona. Nalaglag gayud ang tibuk Sodoma kaniadto. Ngani pipila lamang ang

napahigawas, si Lot ra ug ang iyang duha ka anak nga babaye. Wala man lang gani makalahos ang iyang asawa; tungod milingi man kini. Daw sa unsa ko ka gusto unta nga aduna pa kita'y panahon aron ipakita kana kaninyo karon mismo, kon asa nagabarug kadto nga iglesia sa niadto nga kahimtang. Gusto kong matikdan ninyo karon.

¹⁹⁵ Ug dihay usa ra ka Tawo ang nagpabilin, nga nagpakig-estorya kang Abraham, ug nagbuhat Siya og usa ka ilhanan para kang Abraham. Ug, matikdi ninyo, nga nakita na ni Abraham ang Dios kaniadto diha sa daghan og dagkung mga ilhanan. Nagatoo kita niana, dili ba? [Nagaingon ang kongregasyon, "Amen."—Ed.] Sa wala pa ang umalabot nga anak. Apan sa wala pa nadayag ang maong anak, aduna na'y usa ka ilhanan nga gikahatag kaniya.

¹⁹⁶ Tungod kay, ang Anak, ang tinuod nga Anak, mao man ang mamahimong Anak sa Dios, pinaagi sa pagtoo ni Abraham, kita n'yo, nga mao si Jesus. Kita ingon nga binhi ni Abraham, nga patay na diha kang Cristo, kita'y binhi ni Abraham.

¹⁹⁷ Matikdi n'yo karon sa wala pa kadto mahitabo, ang pag-abot niining anak. Karon, kining Usa nga nagpabilin ra ug nagpakig-estorya kang Abraham, nakatalikod Siya sa balongbalong, ug miingon Siya, "Abraham." Karon, usa lamang ka adlaw sa wala pa kadto, siya'y Abram pa. Karon miingon Siya, "Abraham, asa ba ang imong asawa, nga si Sarah?" dili Sarra, S-a-r-r-a. S-a-r-a-h, prinsesa. "Asa ba ang imong asawa, nga si Sarah?"

Miingon, "Anaa siya sulod sa balongbalong sa likod Mo."

¹⁹⁸ Miingon Siya, "Pagaduawon Ko ikaw, kita mo, sumala sa Akong saad nga gikasaad Ko kanimo." Sa laing pagkasulti, "Pagmoabot na ang panahon, magasugod na usab si Sarah sa iyang naandan nga panahon sa kinabuhi."

¹⁹⁹ Ug si Sarah, ingon nga tigulang na, usa ka gatus na ang panuigon kaniadto, nga anaa sulod sa balongbalong, hilum nga mikatawa. Kita n'yo, mipahiyom siya diha sa iyang kaugalingon, miingon, "Giunsa man sa pagkahimong husto nianang Tawhana? Kita mo, ako nga usa ka tigulang na nga babaye, og ang akong ginoo nga si Abraham nga anaa dinha sa gawas, tigulang na usab, dugay na nga mga tuig kaming human na sa pisikal namong pagpakigrelasyon." Ingon pa, "Unsaon pa man nako pagkaaduna og kalipay sa akong ginoo pag-usab? Siya nga tigulang na, ug ako tigulang na, milagpas na sa edad sa pagpanganak, og patay na ang agianan sa gatas, ang matag. . . 'Naughan na kini.' Unsaon pa man namo pagkaaduna og kalipay pag-usab?"

²⁰⁰ Ug kanang Tawo, nakatalikod Siya sa balongbalong, miingon, "Nganong mikatawa man si Sarah, nga nagaingon, 'Unsaon man pagkahitabo niining mga butanga?'" Unsa man

kadto? Pagpang-ila, usa ka pagtagna! Kita n'yo? Kita n'yo? Mao kadto ang iyang nakita.

²⁰¹ Karon miingon ang maong Tawo, “Magabalik kana pag-usab, ug ang Anak sa tawo,” nga mao na kadto, mao na kadto mismo ang Anak sa tawo. Bueno, gitawag niya Siya nga Elohim, “Ginoong Dios.” Elohim, nasayod ang si kinsa man nga husto kana, si Elohim mao ang Ginoong Dios. “Sa sinugdan si Elohim nagbuhat sa mga langit ug yuta,” ang Maong usa ra nga wala nagkinahanglan og bisan unsa man aron mabuhi. Ang Anak sa tawo nga nahimong unod, atua Siya nga nagatindog diha sa unod niadtong tungora, sama sa usa ka theophany, nagatindog didto nga ginaila kung unsay gisulti ni Sarah diha sa balongbalong sa luyo Niya. Nagsaad Siya. Himatikdi. Ang Harianong Binhi ni Abraham gikasaaran nga makakita nianang mao mismong butang.

²⁰² Apan matikdi ninyo si Lot, adunay mensahero nga miduaw kaniya, usab, duha man sa maong mga lalaki ang miadto didto. Ang usa niini miadto didto, ug ang usa pa miadto usab uban niini, ug nagwali sila ug gipanagtawag ang mga tawo nga mangalagiw gikan sa kapungot nga umalabot.

²⁰³ Kung hisgotan ang kahimtang, wala pa sukad napahimutang ang kalibutan sa ingon-niana nga kahimtang, sugod niadtong adlaw nga gihimo ni Jesus ang saad, hangtud karon mismo. Gusto kong pangutan-on ang si kinsa man nga magsasaysay nga tingali ania sulod sa bilding, o kung madungog man ninyo kining teyp, ug madungog kini sa bisan unsang orasa, palihog padalhi ko ninyo og sulat. Gitun-an ko kaniadto pa ang kasaysayan sulod sa halos traynta ka tuig, ang kasaysayan sa Biblia, ug wala pa gayud ni usa ka tawo sukad ang nakita ko sa tibuok kasaysayan sa iglesia, sa tanang pito ka mga kapanahonan sa iglesia. Kon diin ania na kita karon sa Laodicea, ug nasayod kita niana.

²⁰⁴ Wala pa'y usa ka mensahero sukad, nga nagsangyaw sa tanang iglesia, nga ang iyang ngalan naghinapos og h-a-m, hangtud karon. G-r-a-h-a-m, Billy Graham. Aduna kaniadto og Moody, Finney, Sankey, Knox, Luther, ug uban pa, apan wala gayu'y h-a-m, “amahan sa mga kanasuran.” Karon hinumdumi, nga siya'y G-r-a-h-a-m, unom ka letra. Apan ang A-b-r-a-h-a-m dunay pito ka letra. Matikdi, nga ania na sila, si Billy Graham, nga nagabiyaheng ngadto sa—sa tanang bahin sa kalibutan, ug nagasinggit sa Sodoma, “Panggula na mo, pangalagiw na mo gikan sa kapungot nga umalabot.” Wala pa gyud ko'y naila nga tawo, diha sa natad sa pagpang-misyon, nga ingon niana ang pagkagunit sa Dios, mahitungod nianang pulong nga pagpamatarung, nga sama ni Billy Graham. Arang niyang ipresentar kini. Dili siya usa ka teologo. . . siguro siya'y usa man ka teologo, apan dili siya ingon gayud ka gamhanan nga magtutudlo. Apan nagauban ang Dios diha kaniya. Motindog kana nga tawo didto nga mora'g nagpahigayon lang og usa ka

leksyon pang-Sunday school, og matandog gayud ang mga tawo. Siya'y alagad sa Dios alang sa maong panahon. Para kang kinsa? Sa iglesiang natural, nga anaa sa Sodoma.

²⁰⁵ Apan hinumdumi, nga aduna usab og usa ka espirituhanon nga iglesia, nga wala niadtong denominasyonhong pundok, man lang. Tinawag-pagawas nga iglesia, ug nakadawat sila og usa ka mensahe, usab, ug usa ka mensahero. Ug unsa man kadto? Pagtugkad sa mga hunahuna nga anaa sa kasingkasing. Kanunay gyud nga ginapamatud-an sa Dios ang Iyang Pulong.

²⁰⁶ Mag-ampo kita. Minahal nga Langitnong Amahan, sa niining pinakaimportanteng higayon, diin gikinahanglan ang mga pag-desisyon, padayon nga nagatuyok ang oras, og wala kami mahibalo kung unsang taknaa mahimong moabot ang among Ginoo. Ug sa diha nga makita namo kining mga propesiya nga gipropesiya Niya kaniadto, pinaagi sa Imong mga propeta sa tanang mga kapanahonan, nga nahipadayag na karon. Oh Dios, daw sa unsa ko Ikaw ginapasalamatang tungod niini, tungod niining makusganon nga mga tawo, mga tawong may kasarang sa—sa teolohiya, nga makabarug batok sa mga pagpanglimbong sa kalibutan ug batok sa mga dili-magtotoo, ug sa niining pundok usab sa mga magwawali, nga sa wala gayu'y pagduhaduha nagabarug dinha nga makusganon ug maisogon, nga nahibalo gayud kon diin sila nagabarug ug ginapamatud-an kana nga Pulong ingon nga mao'y matuod, pinaagi sa mga Kasulatan. Ug kami usab nga nagahulat sa Imong Pag-abot, Ginoo, nga nagatoo niining uban pang mga butang nga gipropesiya na nga magakahitabo, nagatindog ug nagakalipay kami nga makita Ka nga nagalakaw sa among taliwala mismo ug nagapamuhat sa mismong butang nga Imong gisulti na nga mahitabo, ginapamatud-an nga husto gayud ang Imong Pulong. Eternal nga Dios, ania karon nagalingkod ang Imong masakiton nga mga anak.

²⁰⁷ Wala ako mahibalo kung unsa pa kadugay nga magapamuhat kami. Nagasalop na ang pang-gabii nga adlaw. Apan nagsaad Ka, ngadto sa propeta, “Sa panahon mismo sa kagabhion motungha ang Kahayag.” Ug makita namo nga ang mao ra nga adlaw nga nagasubang sa sidlakan, mao sa gihapon ang nagasalop sa kasadpan. Ngani mibiyaha ang sibilisasyon uban sa adlaw ug karon ania na kami sa West Coast, ug mibiyaha pud ang Maayong Balita uban sa sibilisasyon. Karon, Amahan, nasayod kami nga mao na kini ang katapusan sa Maayong Balita, ang katapusan sa panahon, ang katapusan sa kapanahonan. Hinay-hinay na kining nagakahanaw paingon sa Eternidad. Apan nagsaad Ka nga motungha ang Anak, ang Anak sa tawo nga igapadayag. Sa kaulahiing mga adlaw, mamahitabo kini. Miabot na ang pang-gabii nga mga Kahayag, Amahan. Ginapasalamatang Ka namo tungod niana. Ug kung unsa na daan kini ka mapainubsanon, sa gihapon gihimo Mo kini nga

yano, nga sa makadaghang higayon, nga miagi ra kini ibabaw sa mga bantugan, og sa mga nagapaila nga mga maalamon, ug ginapadayag kini ngadto sa mga bata ingon nga makakat-on.

²⁰⁸ Nagaampo ako, Dios, nga buhaton Mo kini nga ingon-niana, karong gabhiona, aron makita sa Imong luoy'ng masakiton nga mga anak dinhi ang saad sa Dios, ug mamaayo gayud ang matag usa kanila, ug manggawas sila dinhi, ugma, nga may bag-ong malig-on na nga mga lawas, ug mamaayo na pag-usab. Itugot kini, Ginoo, aron nga madala usab nila ang Mensahe gikan sa usa ngadto sa usa pa, hangtud nga makasulod na sa panon kanang kaulahiing usa, ug dayon pagasirhan na ang mga pultahan. Tabangi kami, minahal nga Dios. Nagapangamuyo ako Kanimo, karong gabhiona, walay sapayan niining tanan, kung mahimo Mo lang sa makausa pa, Amahan, para kanako.

²⁰⁹ Kini—kini daw sa, niadtong miaging gabii, wala kaayo kini namatikdan sa mga tawo. Apan, ginaampo ko, nga itugot Mo kini nga mahitabo pag-usab karong gabhiona, Ginoo. Tungod, milagpas na ko sa gigahin nga oras para kanako nga manulti, apan wala ko kahibalo kung hangtud unsa kadugay nga puede namong mapahigayon kini. Busa, ginaampo ko, Amahan, mahimo Mo ba akong dunggon? Ug dungga ang pag-ampo niining diosnon nga mga kalalaken-an ug mga kababayan-an nga ania dinhi karon, nga napuno sa Imong Espiritu. Sila'y mga magtotoo, Ginoo, makapamuhat Ka gayud sa taliwala nila. Ug kami'y... Ginaampo ko nga Imong panghimatud-an ang Imong Pulong nga gisulti Mo, “Ang nagatoo Kanako, iya usab pagabuhaton ang mga buhat nga Akong ginabuhat.” Itugot kini pag-usab, Jesus, aron mapamatud-an nga Ikaw mao sa gihapon kagahapon, karon, ug hangtud sa kahangturan. Ginapangamuyo ko kini alang sa kahimayaan sa Dios, sa Ngalan sa Iyang Anak, nga si Jesus Cristo. Amen.

²¹⁰ Karon, sa makadiyut lang, gusto kong masayran kung pila ba ka mga tawo ang ania dinhi nga dunay mga prayer kard. Gusto kong—kong ipataas ninyo ang inyong mga kamot, ang matag usa kaninyo nga adunay mga prayer kard. Bueno, ang kadaghanan man, siguro, halos sa tibuok bilding.

²¹¹ Pila kaha ang mga ania dinhi nga walay mga prayer kard, ug bisan pa niana aduna mo'y sakit, mahimo n'yo bang ipataas ang inyong mga kamot ug moingon, “Wala ko'y prayer kard, ug bisan pa niana masakiton ako. Nanginahanglan gyud ako.”

²¹² Buut kong hangyoon kamo nga magmatinahuron sa makadiyut. Karon, ganahan gyud kong makig-estorya kaninyo. Mao kana sa kanunay ang akong problema, hataas kaayo kong mangestorya. Apan sa dili pa kamo mangduol, ako—nagalaum ug nagasalig ako nga pamatud-an kini sa Dios ug ang gisulti ko ingon nga mao'y Kamatuoran, ug pasagdan—pasagdan ra Siya nga magatan-aw.

213 Karon, pila man ang nagalingkod dinha nga mga may sakit, nga nasayod nga wala ko'y hingsayran ni usa ka butang mahitungod kaninyo, ipataas ang inyong mga kamot. Tan-awa lang ninyo kana. Sige.

214 Gusto ko nga kamong walay mga prayer kard karon. Pagatawgon ra pud ang mga may prayer kard. Gusto kong mag-ampo unà kamo.

215 Miingon ang Biblia nga, “Si Jesus Cristo mao sa gihapon kagahapon, karon, ug hangtud sa kahangturan.” Nagaingon Siya nga, “Siya’y usa ka Labaw’ng Sacerdote nga anaa ra dinha nga nagapangaliya sa atong pagsugid.” Kinahanglan natong isugid una kini, sa dili pa Siya mahimong usa ka Labaw’ng Sacerdote, tungod kay Siya nagapangaliya lamang sa atong pagsugid. Husto ba kana, mga igsoong ministro? [Nagaingon ang mga ministro, “Amen.”—Ed.] Kita n’yo, Siya nagapangaliya lamang sa atong pagsugid, sa kung unsay ginasugid nato kung unsa Siya, og kung unsay gibuhat Niya para kanato. Dili ang kung unsay Iyang *pagabuhaton*. Human na Niyang gibuhat kini. Kinahanglan lang natong isugid nga gibuhat na Niya kini. “Siya gisamaran tungod sa atong mga kalapasan, tungod sa Iyang mga labod kita nangaayo.”

216 Karon, nasayod ang Langitnong Amahan. Ug sa pagtan-aw ko diha kaninyo, nakita ko ug namatikdan ang usa ka butan kong higala nga taga Ohio, siya ug ang iyang asawa nga nagalingkod dinhi, nga mao si Mr. Dauch ug iyang asawa. Ug nagatoo kong, ang ikaduha o ikatulong nagalingkod gikan kanila, mao usab si Reverend, Mr. Blair nga akong nakita kagabii. Mangitngit dinha dapit sa mga mananambong, para kanako, tungod niining mga suga dinhi mao nga mangitngit para kanako, ug dili ko—ko kamo makita og ayo.

217 Apan gusto ko nga mag-ampo usà kamo. Ug ibutang ninyo sa inyong kasingkasing ang butang nga inyong gikinahanglan, ug hangyoa ninyo ang atong Labaw’ng Sacerdote, Nga arang matandog sa pagbati sa atong mga kaluyahon.

218 Karon, wala ako makaila kaninyo, ug mahimong mahikap n’yo ako, sa sama rang paghikap n’yo sa inyong igsoon, inyong bana, inyong pastor, kang kinsa man, wala kana—wala kana’y mahatag nga kaayohan. Apan kung inyong hikapon Siya, ug kung nahisubay gayud kita diha sa Iyang Espiritu, nan mahimo Niyang gamiton ang inyong pagtoo aron hikapon Siya, ug ang akong gasa usab aron sa pagtubag.

219 Kita n’yo, mahimo ra akong amang nga sama niini, kining ania *dinhi*, nga walay tingog nga nagasulti pinaagi niini. Kinahanglan aduna gyu’y. . .Kini, amang kini pag walay usa ka butang dinhi nga magasulti pinaagi niini. Ug mao usab ang si kinsa mang tawo, amang siya, paghisgotan na ang ingon-

niining mga butanga, gawas lamang kon magasulti na ang Dios pinaagi kanila.

²²⁰ Karon mag-ampo kamo, ug hibaloon nato kung kining mga butanga nga akong gipanulti kamatuoran ba. Tabangan unta kini sa Dios nga mamaingon niana. Wala ko ginaingon nga Iyang buhaton. Nagalaum ako nga buhaton Niya unta. Nagasalig ako nga buhaton gayud Niya. Wala pa gayud ko Niya gipakyas sukad, sulod sa daghang mga katuigan, sa tibuok kalibutan, sa tanang matang sa mga nasud, ug sa minilyon ka mga tawo. Wala pa gayud ko niya gipakyas sukad-sukad. Ug sigurado ako, sa ingon ka sigurado gayud nga nagatoo kong nagatindog ako dinhi, dili gyud Niya ako pakyason karon.

²²¹ Hangyoon ko kamo nga magmatinahuron gayud ug pabilin lang sa paglingkod, sa makadiyut lang. Ipapauli na nato ang kadaghanan sa mga mananambong ug iampo ang mga masakiton, sa makadiyut lang.

²²² Apan gusto ko nga kamo, kamong mga magtotoo, nga kung dili lang kamo magatan-aw kanako, kondili motoo gayud. Moingon, “Nagatoo ko nga ang gisulti sa maong tawo mao gayud ang Kasulatan. Wala ko kahibalo kon midangat na ba gyud mi sa maong panahon sama sa ginasulti niya nga ania na kami. Apan, kung mao man, nan nagakahitabo na gyud kini. Kung ang iyang mga Pulong mao ang mga Pulong sa Dios, nan, mapakyas man ang iyang mga pulong apan ang mga Pulong sa Dios dili gayud mapakyas.”

²²³ Obligado ang Dios nga suportahan ang Iyang Pulong. Pamatud-an Niya Kini. Pamatud-an gayud Niya Kini. “Ang nagatoo Kanako.” Gipamatud-an Niya nga mao na kini ang kaulahiing adlaw. Gipamatud-an Niya kung unsay magakahitabo. Gipamatud-an usab Niya nga gipaabot na kini nga mahitabo.

²²⁴ Ug, hinumdumi, nga si Abraham ug ang iyang grupo kaniadto wala na nakadawat og usa pa ka ilhanan, hangtud nga miabot na ang gisaad nga anak. Pila man ang nasayod nga tinuod kana? [Nagaingon ang kongregasyon, “Amen.”—Ed.] Ang ilhanan sa pagpang-ila! Ug ang harianong Binhi ni Abraham, padungga ko ninyo...Sultihan ko kamo, MAO KINI ANG GINAINGON SA GINOO, ginadawat na ninyo ang inyong kaulahiing ilhanan. Kana’y sumala sa mga Kasulatan ug sa pinadayag sa Dios nga anaa sa akong kasingkasing, nga magasulti nga Kamatuoran kini. Ug nagasalig ko nga toohan ninyo kini nga mao ang Kamatuoran.

²²⁵ Karon magtoo kamo. Ang tanan magtoo lamang, og moingon, “Ginoong Jesus, tugoti akong mahikap Ka. Aduna ko’y panginahanglan sa akong kasingkasing, ug kahibalo ko nga si Igsoong Branham wala gyu’y hingsayran og unsa man mahitungod kanako. Wala gani ako makaila sa maong tawo,

wala pud siya makaila kanako, apan nakaila Ka. Ug kung ang gisulti niya kanako Kamatuoran, mahitabo gyud kini.” Ginahangyo ko kamo, ayaw na mo paglakaw-lakaw karon, sa makadiyut lang. Magmahimo gayud. . .

²²⁶ Kita n’yo, espiritu man gud mo. Ug ginapahimutang ko ang matag espiritu dinhi ilalum sa akong pagkontrola, sa Ngalan ni Jesus Cristo, aron ang Iyang Pulong mamatuman.

²²⁷ Karon magmatinahuron lang. Mag-ampo. Tan-awa ninyo Siya, moingon, “Ginoo, nagatoo ako niini. Tabangi ang akong pagkadili-matinoohon.”

²²⁸ Sugdan na nato. Kinahanglan kong tutokan ang pipila ka bahin sa bilding dinhi, tungod, kita n’yo, pagkadaghan ninyo, ug ang matag usa kaninyo usa baya ka espiritu.

²²⁹ Dili ko mahimo. Moingon mo, “Ako pud unta?” Dili ko masulti kaninyo. Gamhanan kini. Ang tanang mga buhat sa Dios gamhanan gayud. Daghang mga tawo nga moagi niining entablado ang mahimong mangaayo, karong gabhiona, daghan pud tingali ang dili mangaayo. Anaa kining tanan sa labaw’ng kagahum sa Dios. Kinsa ba ang makasulti Kaniya kung unsay buhaton? Wala ni usa. Nagapamuhat Siya sumala sa Kaugalingon Niyang kabubut-on, sa Kaugalingon Niyang plano.

²³⁰ Apan magtoo lamang kamo. Magmapainubsanon lang. Ayaw’g kahadlok. Kab-ota lang ang Dios, ug moingon, “Ginoong Dios, nagatoo ko niini.” Kita n’yo? “Tugoti kong mahikap ang Imong bisti. Aduna ko’y panginahanglanon nga *ingon niini-ug-ingon niana*. Nasayod ko nga ang maong igsoon wala makaila kanako o kaha nahibalo sa akong panginahanglanon, apan gisultihan man niya kami mahitungod niining mga butang nga Imong gipamuhat kaniadto, ug miingon nga ania Ikaw dinhi nga mao ra gihapon sa karon.”

²³¹ Dili mahimo nga dili kamo apil niana mga kaigsoonan ko dinhi sa entablado, ang si kinsa man kaninyo. Ginahangyo ko lang kamo, mga igsoon ko, ingon nga kauban kong mga mamumuhat diha sa—sa Maayong Balita ni Cristo. Nagasulti ako kaninyo sa ingon ka matinuuron gayud nga nahibaloan ko, ingon nga usa—usa ka mamatay pud nga tawo uban kaninyo, kita n’yo, nga siguradong magabiya pud niining kalibutana. Sigurado gyud kitang magabiya dinhi. Ug kinahanglan akong manubag didto sa Adlaw sa Paghukom, sa kung unsa ma’y akong gisulti. Nasayod ko niana, nasayod gayud. Ug ginapasalamatan ko ikaw igsoon, sa kung unsa ikaw, nga nagatindog dinhi uban kanako, og nagatabang kanako. Gapaningkamot pud ko nga tabangan ka, buhaton ang tanan-tanan nga mahimo ko, alang sa Ginghamarian-sa-Dios.

Nagaampo ako ug nagapangamuyo.

232 Dinhi, pila ba ang nakakita na nianang Kahayag diha sa maong retrato? Nakita na ba ninyo ang retrato Niini? [Nagaingon ang kongregasyon, “Amen.”—Ed.] Anaa Kini nagapaibabaw dinha mismo. Dili ba ninyo Kini makita?

233 Nagapaibabaw Kini nianang gining nga nagalingkod dinha nga ginagunitan ang iyang panyo. Nagaampo siya para sa usa ka minahal sa kinabuhi. Husto kana, gining. [Nagaingon ang maong gining, “Husto kana, Igsoong Branham.”—Ed.] Kana nga minahal sa kinabuhi. . . Nagatoo ka ba kanako nga Iyang propeta, o pasayloa ko, nga Iyang alagad? [“Nagatoo gyud ako.”] Nagatoo ka ba niana? Sige. Karon, kung mahimong ipadayag sa Dios kanako kung unsay problema, bueno, dawaton mo ba kini nga gikan sa Dios, sama sa babaye kaniadto nga mihikap sa Iyang bisti? Karon, nasayod ka nga baynte o traynta ka piye ang gilay-on mo—mo gikan kanako, o sobra pa, og wala mo gayud ako nahikap. Apan Aduna ka’y nahikap, nga hingsayran mong Adunay nagapakigtambo kanimo, Usa-ka-Persona. Kung unsa man kini, para kini sa usa ka babaye, nga imong anak nga babaye. Husto kana. Nagatoo ka ba nga mamaayo ra siya? Siya’y usa na ka adik sa droga. [“Husto kana.”] Eksakto gyud kana. [“Husto kana, igsoon.”] Makita ko siyang nagalangoy, nga hubog na. Kita mo? Karon, ang panyo nga aduna ka diha sa imong kamot, ipandong mo kana kaniya, ug ayaw pagduhaduha. Nagatoo ko nga luwason gyud siya sa Dios. Toohan mo ba kini uban kanako? Amen. [“Oh! Salamat Kanimo, Jesus!”]

234 Karon, wala ako makaila sa maong babaye, apan nakaila ang Dios kaniya. Nagatoo ka ba karon sa tibuok mong kasingkasing?

235 Ang lalaki nga nagalingkod dinha nga nagasul-ob og may badlis-badlis nga sinina, nga dunay sakit nga hernia, nagatoo ka ba nga ayohon ka sa Dios ug himoong maayo na? Nagatoo ka ba nga buhaton Niya kini? Wala ko pa gayud nakita sukad ang maong lalaki sa tibuok kong kinabuhi. Aduna ka ba’y prayer kard, sir? [Nagaingon ang lalaki, “Wala, wala.”—Ed.] Wala ka nakakuha? Dili mo kana kinahanglan.

“Kung mahimo mong toohan!”

236 Aniyay nagalingkod nga usa ka babaye nga gapaningkamot nga makakita sa ibabaw niining babaye nga nagalingkod pud dinhi mismo. Siya’y usa ka estranyo kanako. Apan ginerbiyos gyud siya og ayo. Dili ko siya kaila. Wala ko pa gayud siya nakita, sa tibuok kong kinabuhi. Apan nakaila man ang Dios kaniya, ug naamgo niya karon mismo nga Aduna siya’y kapakigtambo. Dugay ka nang nagaampo dinha para sa usa ka hinungdan. Ang hinungdan nga nagaampo ka, tungod dili ka na puedeng magpabilin pa og mas dugay-dugay karong gabhiona. Kinahanglan mo nang mobiya sa panagtigum. Nagaplano ka nga mopauli na sa imong panimalay, ugma. Dili ka taga dinhi, o dili usab ka taga California. Moadto ka pa sa sidlakan gikan dinhi.

Moadto ka didto nga mosakay og eroplano. Nagaplano kang, moadto sakay og eroplano. Taga Oklahoma ka. Oo. Husto kana.

²³⁷ Anaa ka usa sa himalatyon na nga kahintang. Mianhi ka dinhi aron maiampo. Wala ka'y prayer kard. Apan gitooan mo gayud nga mamaayo ka, kung makaanhi ka lang dinhi. Husto kana. Usab, kanser ang imong sakit. Anaa ang kanser sa bukog. Nagatoo ka ba nga mamaayo ka na karon? Nagatoo ka ba nga nakapakigtagbo ka Kaniya, igsoon kong babaye? Tingali'g isulti kanako sa Dios kung si kinsa ka, kung ingon-ana makatabang ba kana kanimo? Kung makatabang man, ipataas ang imong kamot kung nagatoo ka niana, nga (ang Dios) magatabang kanimo. Okey, Mrs. Steel, mahimo ka nang mobalik sa Oklahoma.

Wala ako makaila sa maong babaye. Wala ko pa gayud siya nakita sukad.

²³⁸ Aniay usa pud ka babaye nga nagalingkod dinhi mismo sa luyo sa maong babaye. Nagaantus siya tungod sa barikos sa ugat. Ug siya aduna usab og anak nga lalaki nga usa ka palahubog, ug nagaampo siya para kaniya. Kung motoo siya, mamaayo gayud siya. Mrs. Mason, motoo ka ba sa tibuok mong kasingkasing, ug motoo nga ihatag ni Jesus Cristo ang kaayohan para kanimo? Nagatoo ka ba?

²³⁹ Sige, kung ingon-ana ipandong ang imong kamot diha nianang babaye nga nagalingkod sunod nimo dinha, nagaampo siya para sa iyang bana nga wala pa naluwas. Igahatag gyud sa Dios ang kaayohan.

Mag-ampo kita.

²⁴⁰ Minahal nga Dios, ginaampo ko nga ihatag Mo kana nga panalangin para sa maong babaye. Ihatag nianang babaye ang ginatinguha sa iyang kasingkasing, Ginoo. Ang iyang pagtoo haduol kaayo nganha Kanimo, nga nahikap Ikaw niini. Ug ginaampo ko, Amahan, nga motabang Ka, sa Ngalan ni Jesus. Amen.

²⁴¹ Karon magtoo ka sa tibuok mong kasingkasing, nga madawat mo kini. Mahimo mo ba kana? Sige. Panalanginan ka sa Dios.

²⁴² Nagatoo ka ba nga mamaluwas ang imong bana, gining? Nagatoo ka ba sa tibuok mong kasingkasing? Ipataas ang imong kamot, kon nagatoo ka.

²⁴³ Daw sa, atubangan ko, adunay usa ka babaye nga daku kaayo. Nagalingkod siya dinha. Nagatoo ka ba kanako nga alagad sa Dios? Nagatoo ka ba kanako nga alagad sa Dios? Nagatoo ka. Bueno. Wala ako makaila kanimo. Ang imong sakit, mao'y sa mga glandula. Misobra na ang imong timbang. Miadto ka na sa usa ka doktor, miingon ra kini nga wala na kono siya'y unsa mang mahimo mahitungod niana, apan usa ra man kadto ka yutan-on nga doktor. Kita n'yo? Imong. . . Daghan kaayo ka

og kasub-anan. Namatay ang imong bana. Dili pud ka taga dinhi. Taga Arkansas ka. Nagapangita ka og trabaho, usab, ug dili ka gyud makakita og trabaho. Nahadlok ka nga, basin, dili ka tawgan. Apan ang imong pagtoo ang mihikap sa Dios karon. Igsoon ko, lakaw na, nga nagatoo. Hatagan ka sa Dios og trabaho, og ihatag kanimo ang tinguha sa imong kasingkasing.

²⁴⁴ Ginapamatud-an gyud sa Dios nga tinuod ang Iyang Pulong. Nagatoo ba kamo nga tinuod kana? [Nagaingon ang kongregasyon, “Amen.”—Ed.] Karon gusto ko na pud nga magampo kamo uban kanako pag-usab.

²⁴⁵ Amahan, nga Dios, Ikaw ang mao sa gihapon nga Dios nga nagpamatuod kaniadto. Sa dihang miingon Ka, “Ang dalagita dili patay, nahikatulog ra siya,” dayon gipamatud-an Mo kini kaniadto. Karon, nagsaad Ka, nga sa dili pa moabot ang katapusang panahon, nga igapadayag sa Anak sa tawo ang Iyang Kaugalingon sa mao ra nga paagi nga gibuhat Niya didto sa Sodoma. Gisaad Mo kini, Ginoo. Karon mianhi Ka sa yuta, diha sa porma nga Balaang Espiritu, ug nagpataliwala kanamo, karong gabhiona, kanamo nga mga tawong nagatoo, ug gipamatud-an kini. Gipamatud-an Mo ang Imong Pulong sama sa Imong gibuhat niadto nga adlaw. Ginoo, wala na kami nanginahanglan og dugang pa nga pagpanghimatuod. Ania Ka na sa among taliwala. Ginahigugma Ka namo. Ug naamgo namo nga mao na kini ang kaulahiang ilhanan sa dili pa ang Imong Pag-abot, sumala sa mga Kasulatan. Ug ang tanang mga landong ug mga tipo dili gayud mapakyas. Sigurado gyud ang mga niini.

²⁴⁶ Busa ginaampo namo, Amahan, sa diha nga mangduol na ang Imong mga anak karon aron maiampo, mamaayo ang matag usa. Hinaut nga wala na’y usa ka tawong masakiton ang mobiya sa taliwala namo, sa pagtapos na niining panerbisyo sa pagpangayo. Oh minahal nga Dios, mahimo bang magrasyahon nga ihatag Mo ang Imong pagdihog sa Imong mga tawo karon mismo, aron ang matag usa kanila mamaayo na?

²⁴⁷ Ug kung aduna ma’y pipila dinhi, nga dili pa Nimo mga anak, ug sumala sa basihanan niining mga butanga, nga... Napatalinghugan na nila ang Pulong ug nakita na ang butang nga nahitabo, nga gipamatud-an sa ingon niana gayud ka eksakto, ug kon si Kinsa Ka ug kon unsa Ka, nga ania Ka gayud dinhi.

²⁴⁸ Ug, Ginoo, puede Mo—puede Mo ba diay panalanginan ang usa ka bakak? Aba, siguradong dili gyud, Ginoo. Apan nagsaad Ka nga panalanginan Mo ang Imong Pulong, ug dili gyud Kini magabalik nga walay-kapuslanan. Kini siguradong magatuman gayud sa kung unsay katuyoan Niini. Ug karon gibuhat Mo kana sa atubangan namo, niining gabhiona, nga wala gyu’y landong sa pagduhaduha.

249 Ug samtang nakaduko ang atong mga ulo, aduna ba’y mga tawo dinhi nga wala pa gayud mitoo sukad-sukad kaniadto, nga gusto mong ipataas ang imong kamot? Samtang nakaduko ang inyong ulo, ipataas lang ang inyong kamot. Ug tindog mo, ug moingon, “Nagatoo na ko karon, sa tibuok kong kasingkasing. Ug gusto kong dawaton si Jesus Cristo, karon na mismo.” Buhaton n’yo ba kana, ang si kinsa man nga mga tawo, ang si kinsa man nga ania dinhi, nga wala pa gyud midawat kang Cristo, ug gusto na nga buhaton kana niining orasa? Dili ko kamo sultihan. . . Tambong lang mo sa iglesia nga gusto ninyo. Apan ang ginahangyo ko kaninyo nga dawaton n’yo si Jesus Cristo samtang inyong. . . Tingali’g dili na gayud kamo mahimong mas mapahiduol pa Kaniya hangtud nga makita ninyo Siya sa personal pagmoabot na Siya nga anaa na sa Iyang makita nga lawas gikan sa Kalangitan. Mahimo ba ninyo karon nga dawaton Siya kung wala pa ninyo nabuhat kini?

250 Sumala sa basihanan nga wala ko’y nakita ni usa man nga nagatindog dinhi, kung ingon-ana nagatoo ko nga ang tanan kaninyo tarung ang pangisip, may maayong salabutan, ug nahibalo sa kung unsay inyong ginahimo. Kung nagalingkod man kamo dinha ilalum niini, timan-i ninyo, “Kung nagakaulaw ka tungod Kanako sa atubangan sa tawo, igakaulaw Ko ikaw sa atubangan sa Akong Amahan.” Aduna na’y usa nga nagtindog, siguro, oo, diha sa mga mananambong, sa luyo.

251 Minahal nga Dios, tingali’g kanang mga, wala nako makita, nga nagatindog, gusto na nilang dawaton Ka. Naamgo nila, Ginoo, nga wala pa gyud nahimo ang ingon-niini hangtud niining higayona, ug karon gipanghimatud-an Mo kini ug gipamatud-an nga ingon-niana kini. Ginaampo ko, Amahan, nga diha sa ilang mga kasingkasing, nga pagkatalagsaon nanglihok niining orasa. . . Mahimong masayran na lang namo nga mao na diay kini ang kaulahiyan nga magasulod? Mahimong mao na kini ang katapusan sa Los Angeles. Tingali mao na usab kini ang kaulahiyan kalag nga matawo pasulod ngadto sa Ginghamarian. Wala kami masayod kung kanus-a moabot kana nga panahon. Ug pagmoabot na kana, pagasirhan na ang pultahan, ug makumpleto na ang Lawas. Dili na kini usa ka kibag nga Lawas o kaha usa ka kibag nga Pangasaw-onon. Magkaaduna na Kini og ingon ka daghan nga mga miyembro kinsang mga ngalan nahisulat na diha sa Basahon sa Kinabuhi sa Cordero sa wala pa ang pagkatukod sa kalibutan, nga mao’y gianhi ni Jesus aron pagakuhaon, sama ni Adan, nga migawas aron luwason kaniadto ang iyang asawa. Ginaampo ko, Dios, nga dawaton Mo sila karon pasulod nganha sa Imong Ginghamarian. Sila’y anaa na sa Imong mga kamot. Tagda sila, Ginoo, nagaampo ako sa Ngalan ni Jesus. Amen.

252 Panalanginan sa Dios ang matag usa kaninyo nga mga nagatindog. Wala ko kahibalo nga ang uban kaninyo nagatindog

na diay. Nagatindog ang uban diha sa luyo, ang uban usab diha sa balkonahe. Karon gusto ko nga buhaton ninyo ang usa ka butang para kanako. Palihog sabta lang ko ninyo. Pakighimamat mo sa niining pipila ka ministro dinhi ug estoryahon sila bahin niini, human nga matapos na ang simba. Mahimo n'yo bang buhaton kana? Ayaw gyud ninyo pakyasa kini. Kung kamo wala pa mabautismohi sa Cristohanong bautismo, buhata na kana dayon, ug pagkahuman magpabilin nga nakataas ang inyong mga kamot hangtud nga madawat ninyo ang Espiritu Santo.

²⁵³ Karon, ug daghang mga tawo ang adunay prayer kard dinhi. Hangyoon nato sila nga motindog, ug moduol na dinhi, ug siguro moagi dinhi dapit. O kinahanglan ba nga ako na lang ang moanha . . . [Nagaingon ang usa ka lalaki, "Dili."—Ed.] Dili man pud nako mahimo. ["Duol ka gikan dinhi niining dapita."] Ang mga mogikan *niining* dapita, mahimo rang makaagi sa niini nga agianan, dinhi niining dapita, kadtong mga adunay prayer kard.

²⁵⁴ Ug karon kung adunay si kinsa man kaninyo nga kinahanglan nang mopauli, tungod . . . Naulahi man gud ko. Pasayloa ko. Paningkamotan kong himoon nga mas sayo-sayo ugma sa gabii. Sa . . . diyes minutos na human nga milabay ang alas diyes, sa orasan diha sa bungbong. Salamat kaayo sa inyong pagtambong karong gabhiona, ug hinaut nga panalanginan kamo sa Dios sa Langit. Kung gusto pa ninyong magpabilin ug motan-aw sa linya sa pagpaampo, kanunay gayud kamong ginaabi-abi. Apan sugdan na natong iampo ang mga masakiton karon, ug dili ko gustong langanon kamo gawas kon gusto pa ninyong magpabilin. Makapanguli na kamo sa Ngalan ni Ginoong Jesus. Hinaut nga ang pakigdait sa Dios magauban kaninyo ug panalanginan kamo, ug hatagan kamo og kapahulayan sa inyong mga lawas, sa tibuok gabii, ug hatagan pud kamo og maayong panglawas aron nga makabalik kamo pag-usab ugma sa gabii. Ang Dios magauban kaninyo karon.

²⁵⁵ Ug manindog na ang mga adunay prayer kard para sa pag-ampo karon, samtang magaampo kita para sa tanan. Karon gusto namong mahibaloan ninyo, karon, kamong mga nagatindog nga adunay prayer kard, aduna ba'y unsa man nga pagduhaduha sa inyong kinabuhi? Aduna ba, pasayloa ko, og unsa man nga kasalanan sa inyong kinabuhi nga wala pa ninyo gisugid? Kung aduna man, tugoti kong hangyoon kamo og ingon-niini. Ayaw mo pagduol diha sa linya sa pagpaampo kon aduna pa'y sala diha sa inyong kasingkasing nga wala pa gisugid. Tungod, kinahanglan ninyong . . . Tinapay kini para sa mga anak, kita n'yo. Ug kung dili pa kamo Cristohanon, isurender n'yo ang inyong kinabuhi nganha kang Cristo, diha sa linya sa pagpaampo, dayon duol na mo. Para kini sa magtotoo. Mahimo ba ninyong buhaton kini? Dawata ninyo Siya una ingon nga inyong Manluluwas, ug dayon duol dinhi sa entablado, aron maiampo kamo.

²⁵⁶ Karon magaampo pud ako para sa matag usa; dili nga labyan lang sila, nga mora og tinaphaw lang. Ania kita sa iglesia karon. Sa hunahuna ko gihatagan gyud mi ni Igsoong babayeng Wyatt og hinungdan nga makapabilin pa kami ug mag-ampo. [Nagaingon ang usa ka lalaki, “Oo, sa tibuok gabii, kutob sa gusto ninyo.”—Ed.] Mahimo ra kono tang magpabilin kutob sa gusto nato. Ug ginapasalamatan ko si Igsoong Wyatt ug ang mga kawani dinhi, nga gitugotan kitang buhaton kana. Panalanginan siya sa Dios. Ang iyang bana kaniadto mibarug usab dinhi niini nga entablado, nga nag-ampo para sa mga may sakit, hangtud sa namatay kini, kutob sa nahibaloan ko, usa gayud ka tinuod nga sundalo sa krus. Ug karon ginapaningkamotan ko usab nga padayong buhaton ang mao gihapong butang, nga panalanginan kining mga tawo.

²⁵⁷ Ug karon ginaampo ko nga ang matag usa kaninyo nga magaagi dinhi. . . Dili man gyud ninyo kinahanglang isugid ang unsa mang butang nga gusto ninyo. Dili pud ninyo kinahanglang isulti ang unsa mang butang nga sayup diha kaninyo. Duol lang mo ug tugoti kong iampo kamo, ug magtoo lang gyud.

²⁵⁸ Nagatoo ba kamo nga gipadala ako sa Dios aron buhaton kini? Ipataas ang inyong kamot. Mahinumduman pa ba ninyo kung unsay gisulti sa Manulonda sa Ginoo? “Kung mapatoo mo lang ang mga tawo kanimo, og magmatinuuron lang sa dihang magaampo ka, walay bisan unsa man ang makababag sa maong pag-ampo.” Ug nasayod kamo nga tinuod kana. Napamatud-an na gyud kini, sa makadaghan nang higayon.

²⁵⁹ Karon hangyoon ko ang atong Igsoong Rose, kung mahimo niya, nga tugtugon kanang, *Only Believe*, o, *The Great Physician Now Is Near*, o mora’g ingon-niana.

²⁶⁰ Gusto ko nga ang matag usa kaninyo karon nga—nga nagapakig-fellowship uban kanako. Mahimo n’yo ba, usab, kamong mga tawo nga wala diha sa linya sa pagpaampo, mahimo ba ninyong mag-ampo usab para niining mga tawo? Bueno, isaad kana kanila, pinaagi sa pagpataas sa inyong kamot, “Magaampo ako, kita n’yo. Magaampo kaming tanan.” Sige. Oo.

²⁶¹ Buut ko nga kon mahimo ninyo, kung kinahanglan na ninyong mopauli, lakaw lang mo nga mahilumon ha, aron nga dili sila madisturbo samtang nagaampo kami.

²⁶² Nagatoo ka ba nga matapos na kini karon, igsoon? [Nagaingon ang igsoong babaye, “Sa tibuok kong kasingkasing.”—Ed.]

²⁶³ Minahal nga Dios, ginapandong ko ang akong mga kamot sa maong igsoon, og ginahagit ang balatian sa iyang lawas. Sa Ngalan ni Jesus Cristo, hinaut nga mobiya na kini kaniya. Amen.

Panalanginan ka, igsoon.

264 Nagatoo ka ba sa tibuok mong kasingkasing? Gisugid mo na ba ang tanan mong mga sala? Ikaw, kutob sa nahibaloan mo, andam ka na bang dawaton ang imong kaayohan?

265 Minahal nga Dios, ginapandong ko ang akong mga kamot sa igsoon kong babaye, sa Ngalan sa Imong Anak, nga si Jesus Cristo, ug nagahangyo nga mawala na ang balatian sa iyang lawas, sa Ngalan ni Jesus. Amen.

266 Gisugid na ba ang tanang mga sala, ug andam ka na ba alang sa imong kaayohan? Nagatoo ka ba, igsoon? [Nagaingon ang igsoong lalaki, “Nagatoo ako sa tibuok kong kasingkasing.”—Ed.]

267 Minahal nga Dios, ginapandong ko ang akong mga kamot sa igsoon kong lalaki, ingon nga nasayod kaming ania Ikaw dinhi, Ginoo. Nagaampo ko nga ayohon Mo siya, sa Ngalan ni Jesus Cristo. Amen.

268 Gisugid na ba ang tanang mga sala? Dili, dili ka makadungog. [Nagasulti nga hinay-hinay ug klaro si Igsoong Branham tungod sa pagkabungol sa igsoong babaye—Ed.] Nagatoo ka ba nga makadungog ka na? [Nagaingon ang igsoong babaye, “Nagatoo ko. Apan dugay na akong bungol.”] Magtoo ka.

Bungol ang maong babaye karon. Magaampo kita dinhi.

269 Minahal nga Dios, nagaampo ko nga ayohon Mo ang among igsoon, ug kuhaa kining pagkabungol gikan kaniya. Napahimutang siya sa usa ka linain nga kalibutan, kon diin dili siya makadungog. Ginaampo ko nga ihatag Mo ang iyang kaayohan, pinaagi sa Ngalan ni Jesus.

270 Hangyoon ko ang mga tawo nga ipapabilin nga nakaduko ang inyong ulo, sa makadiyut. Gusto kong tan-awon kung unsa na’y nahitabo kaniya. Karon, palihog lang, sa Ngalan ni Jesus Cristo, wala usa’y mohangad sa ilang ulo o mga mata. Karon, ayaw ninyo buhata kana hangtud nga sultihan ko na kamo.

271 Makadungog ka na ba kanako karon? [Nagaingon siya, “Medyo dili pa kaayo.” Gipakpak ni Igsoong Branham ang iyang mga kamot sa makausa. “Makadungog na ko nimo.”—Ed.] Madungog mo na ba ako? [“Halos.”] Makadungog ka na ba? Makadungog na siya karon. [Nagapakpak si Igsoong Branham sa makausa pa.] Kita mo? Nadungog mo ba kana nga tingog?

272 Karon magtoo ka sa tibuok mong kasingkasing. Mahimo mo ba? Ug magtoo ka, ug himoon ka sa Dios nga bug-os na nga mamaayo. Ingon siya. Nag-ampo lang ko ug gibutang ang akong mga kamot sa iyang mga dalunggan, ug ingon niya nga aduna na kono siya’y madungog. Bueno, padayon ka lang karon, nga nagatoo nga hingpit ka rang makadungog, ug makadungog ka ra gayud.

273 Gisugid mo na ba ang tanang mga sala, igsoon? [Nagaingon ang igsoong babaye, “Oo.”—Ed.] Andam ka na ba para sa imong kaayohan? [“Oo.”]

274 Minahal nga Dios, ginapandong ko ang akong mga kamot sa igsoon kong babaye, ingon nga nanghibalo nga wala gyu’y maayong butang kanamo, sa among mga kaugalingon. Apan nasayod kami nga mga Cristohanon kami, nga natawo na sa Espiritu sa Dios. Ug nagapandong kami og mga kamot sa among igsoon ug nagapangamuyo alang sa iyang kaayohan, sa Ngalan ni Jesus Cristo. Amen.

275 Karon nagatoo ka ba nga mamaayo ka na? [Nagaingon ang igsoong babaye, “Oo!”—Ed.] Bueno, karon naayo ka—ka na. [“Oo!”] Ingon niana kini. Husto kana. Maayo.

276 Nasugid na ba ang tanang mga sala? [Nagaingon ang igsoong babaye, “Oo, sir.”—Ed.] Ug andam ka na ba para sa imong kaayohan? [“Oo.”] Nagatoo ka ba, nga pinaagi sa pagpandong og mga kamot, nga ang Dios Nga nahibalo sa mga kasingkasing sa mga tawo, himoon kang mamaayo na? [“Nagatoo ko.”]

277 Langitnon namong Amahan, nagaampo ko nga ayohon Mo ang igsoon namong babaye, samtang ginapandong namo ang among mga kamot diha kaniya ug nagapangamuyo sa Ngalan ni Jesus Cristo nga himoon Mo siya nga mamaayo na. Amen.

278 Kumusta ka? Siyempre, nasayod ka nga kahibalo ko kung unsay problema diha kanimo. [Nagaingon ang igsoong babaye, “Oo.”—Ed.] Apan dili ko lang isulti kini; tungod kay, pagmahibalo ka na, kini’y—kini’y magpadayon lang gihapon ug magpadayon. [“Okey.”] Apan kung imong . . . Nasugid na ba ang tanang mga sala? [“Oo, sir.”] Ug nagatoo ka ba nga ayohon ka na sa Dios? [“Oo, sir.”] Nagatoo ka ba nga ang arthritis . . . Nasulti ko na hinoon.

279 Minahal nga Dios, nagaampo ko nga tabangan Mo siya ug ayohon siya. Itugot kini, sa Ngalan ni Jesus.

Dili ka gayud mabakul. Lakaw na, og magtoo sa tibuok mong kasingkasing.

280 Nagatoo ka ba nga himoon ka sa Dios nga mamaayo na? [Nagaingon ang igsoong babaye, “Amen.”—Ed.] Nasugid na ba ang tanang mga sala ug andam ka na ba para sa imong kaayohan? Nagatoo ka ba nga ang imong likod mamaayo ra?

281 Minahal nga Langitnong Amahan, nagaampo ko nga ayohon Mo siya ug himoon siya nga mamaayo na. Sa Ngalan ni Jesus Cristo, hinaut nga mamaingon gyud kini. Amen.

Panalanginan ka sa Dios, igsoon. Lakaw, nga nagatoo na karon.

282 Nasugid na ba ang tanang mga sala, igsoon, og andam ka na ba para sa imong kaayohan?

283 Minahal nga Dios, ang iyang mga sala, ingon siya, nga gisugid na kono niya. Ginapandong ko ang akong mga kamot sa niini nga babaye, sa Ngalan ni Jesus Cristo, nagapangamuyo ko para sa iyang kaayohan. Amen.

284 Nasugid na ba ang tanang mga sala? Husto gyud ka, masakiton ka kaayo, nasayod ka niana. Nasayod pud ka nga nahibalo ko kung unsay problema diha kanimo. Ug nagatoo ka ba nga himoon ka sa Dios nga mamaayo na, ayohon ang imong kasingkasing ug himoon kang bug-os gyud nga mamaayo na?

285 Minahal nga Dios, nagaampo ko nga sa Ngalan ni Jesus Cristo, nga ayohon Mo siya ug himoon siyang mamaayo na. Hinaut nga mobiya na kini kaniya, Amahan, sa Ngalan ni Jesus. Amen.

Panalanginan ka karon sa Dios. Ayaw pagduhaduha. Lakaw, nga nagatoo.

286 Nasugid na ba ang tanang mga sala? Andam ka na ba para sa kaayohan?

287 Minahal nga Langitnong Amahan, ginapandong ko ang akong mga kamot diha sa igsoon namong babaye. Sa Ngalan ni Jesus Cristo, hinaut nga mamaayo na siya. Amen.

Ayaw pagduhaduha. Lakaw na, nga nagatoo.

288 Nasugid na ang tanang mga sala, og andam ka na ba para sa kaayohan?

289 Minahal nga Langitnong Amahan, nagaampo ko nga ayohon Mo ang igsoon namong lalaki, himoon siya nga mamaayo na. Itugot kini, Amahan. Ginapandong ko ang akong mga kamot diha kaniya, alang niini nga katuyoan, sa Ngalan ni Jesus Cristo. Amen.

Panalanginan ka sa Dios. Nagatoo ko niini sa tibuok kong kasingkasing.

290 Nagatoo ka ba karon, igsoon? Nasugid na ba ang tanang mga sala ug andam ka na ba para sa kaayohan?

291 Minahal nga Dios, ginapandong ko ang akong mga kamot sa igsoong babaye, sa Ngalan ni Jesus Cristo, hinaut nga mamaayo na siya alang sa Imong himaya. Amen.

292 Karon pagkadaghan nang mga higayon nga sama niana, nga sa usa lamang ka hikap, maingon sa gisulti ni Jesus, “Kini nga mga ilhanan maganunot kanila nga nagatoo. Kung pandongan nila sa ilang mga kamot ang mga masakiton.” Sugod kong namatikdan, diha sa mga panagtigum, nga moepekto gayud kini singkwenta porsyento nga mas maayo kay sa kung tawgon mo ang mga tawo para maglina, magkaaduna og pagpang-ila, tungod kay makapakigtambo ka og pipila lamang. Ug, sa niining paagi, mas daghan ang mangaayo.

293 Nasugid mo na ba ang tanan mong mga sala tungod sa dili-pagtoo ug tanan-tanan na? Nagatoo ka ba karon nga mamaayo ka na? [Nagaingon ang igsoong babaye, “Oo, ug hilwas na.”—Ed.]

294 Minahal nga Dios, nagaampo ko nga ayohon Mo ang igsoon namong babaye samtang ginagunitan ko ang iyang mga kamot ug nagapangamuyo sa Ngalan ni Jesus Cristo alang sa iyang kaayohan. Amen.

Panalanginan ka sa Dios, igsoon.

295 Nagatoo ka ba karon? [Nagaingon ang igsoong babaye, “Oo.”—Ed.] Nasugid na ba ang tanang mga sala? [“Oo.”]

296 Minahal nga Dios, ginapandong ko ang akong mga kamot diha sa among igsoon, sa Ngalan ni Jesus Cristo, alang sa iyang kaayohan. Amen.

Panalanginan ka sa Dios, igsoon.

Daw sa usa ra ka gamay kaayo nga butang, apan ang Dios gyud kini Nga nagsaad niini.

297 Nasugid na ba ang mga sala?

298 Minahal nga Dios, nagaampo ko nga ayohon Mo kining among igsoong babaye. Samtang ginapandong ko ang akong mga kamot diha kaniya sa Ngalan ni Jesus Cristo, hinaut nga mopauli siya nga mamaayo na. Amen.

299 Gisugid na ba ang mga sala?

300 Minahal nga Dios, nagaampo ko nga ayohon Mo ang igsoon namong babaye, samtang ginapandong ko ang akong mga kamot diha kaniya, sa Ngalan ni Jesus Cristo. Amen.

301 Karon samtang nagaduol ka nga adunay mekanika, hinaut nga igoon niini ang dinamika, og moandar gyud kini.

302 Gisugid na ba ang mga sala? [Nagatubag dayon ang igsoong babaye—Ed.] Andam ka na.

303 Minahal nga Dios, nagaampo ko nga ayohon Mo siya ug himoon siyang mamaayo na, sa Ngalan ni Jesus Cristo. Amen.

Panalanginan ka sa Dios, igsoon.

304 Gisugid na ba ang tanang mga sala? [Nagaingon ang igsoong babaye, “Tanan-tanan na.”—Ed.]

305 Minahal nga Dios, samtang ginatutokan ko niining babaye, nagatoo ko niana. Nagaampo ko nga ayohon Mo siya, sa Ngalan ni Jesus.

306 Gidala mo lang siya, dili ba, igsoon? Gidala mo lang siya? Okey. [Nagaingon ang igsoong babaye, “Siya’y buta, usab.”—Ed.] Nagatoo ka ba, igsoon, nga ayohon ka sa Dios? [Nagaingon ang buta nga igsoong babaye, “Nagatoo ko nga mahimong ihatag sa Dios kanako ang akong panan-aw pag-usab.”] Panalanginan ka sa Dios.

307 Langitnong Amahan, kanunay Ka gayud nga maloloy-on sa mga buta, ug sa mga nanginahanglan. Karon nakita gyud nila kung unsay gibuhath Mo karong gabhiona. Busa nagatoo kami, Ginoo, sa niining gamhanang kaulahiing ilhanan nga nagapanglihok sa among taliwala karon. Nagapangamuyo ako alang sa panan-aw niining buta nga babaye nga moabot na kaniya, sa Ngalan ni Jesus Cristo. Amen.

308 [Ang maong buta nga babaye, nagaingon, “Salamat Kanimo, Jesus.”—Ed.] Karon, ipahibalo na kanamo ha. Ipahibalo kini. [“Ipahibalo ko gayud!”]

309 [Ang babaye usab nga mao’y nagdala sa buta nga babaye, nagahangyo og pag-ampo—Ed.] Oh, oo, nagatoo ka ba nga ayohon ka sa Dios? [“Alleluyah!”]

310 Minahal nga Langitnong Amahan ginapandong ko ang akong mga kamot sa igsoon namong babaye ug nagapangamuyo nga ayohon Mo siya, sa Ngalan ni Jesus Cristo. Amen.

311 Panalanginan ka sa Dios, igsoon. Tugoti kaming madungog kung unsay imong—kung unsa na.

312 Nagatoo ka ba, igsoon? [Nagaingon ang igsoong babaye, “Oo, nagatoo ko.”—Ed.]

313 Oh Minahal nga Langitnong Amahan, nagaampo ako para sa among igsoong babaye, nagasalig nga ayohon Mo siya karon. Ginapandong ko ang akong mga kamot diha kaniya, sa Ngalan ni Jesus Cristo.

Karon magtoo ka. Husto kana. Lakaw, nga nagatoo.

314 Nagatoo ka ba, igsoon? [Nagaingon ang igsoong lalaki, “Oo.”—Ed.] Gisugid na ba ang tanang mga sala?

315 Minahal nga Dios, nagaampo ko nga ayohon Mo ang igsoon namong lalaki ug himoon siyang mamaayo na, sa Ngalan ni Jesus Cristo. Amen.

316 Nagatoo ka ba, igsoon?

317 Oh Dios, nagaampo ako nga, sa Ngalan ni Jesus Cristo, nga sa pagkamapainubsanon, sa kalumo ug kaaghop niining taknaa, hinaut nga hingpit nga ayohon sa Balaang Espiritu kini nga babaye. [Nagaingon ang igsoong babaye, “Ug nagaampo ako, nagaampo pud ko para sa akong anak. Wala ko na siya makita sulod sa baynte na ka tuig.”—Ed.] Ginaampo ko nga ipadala sa Dios ang imong anak diha kanimo, igsoong babayeng, pinangga. Panalanginan ka sa Dios.

318 Minahal nga Amahan, nagaampo ko para sa among igsoong babaye dinhi. Sa kalumo sa Balaang Espiritu, hinaut nga moabot Siya karon ug ayohon ang among igsoon, sa Ngalan ni Jesus. Amen.

Panalanginan ka, igsoon.

319 Minahal nga Dios, nagaampo ko para sa among igsoong lalaki, samtang nagatindog siya dinhi ug nagapandong ko og mga kamot diha kaniya, ug nagapangamuyo para sa iyang kaayohan, sa Ngalan ni Jesus.

320 Panalanginan ka, igsoon ko. [Nagaingon ang igsoong lalaki, “Panalanginan ka sa Dios.”—Ed.] Bueno.

Batang lalaki?

321 Minahal nga Dios, samtang ginapandongan ko og mga kamot kining bata, ginapanalanginan ko siya sa Ngalan ni Jesus Cristo, para sa iyang kaayohan.

322 Nagatoo ka ba karon, igsoon? [Nagaingon ang igsoong babaye, “Oo.”—Ed.] Gusto mong maiampo usab?

323 Minahal nga Dios, nagaampo ko para kaniya, samtang nagapandong ko og mga kamot diha kaniya. Karon, mao kini ang Imong sugo, mao kini’y Imong gisulti nga buhaton, “Kini nga mga ilhanan maganunot kanila nga nagatoo. Kung pandongan nila sa ilang mga kamot ang mga masakiton, mangaayo sila.” Gisulti mo kini, Ginoo. Amen.

Karon, gisulti Niya kana, dili Ba? Siguradong matuman gyud kana, igsoon.

324 Minahal nga Dios, nagaampo ko nga ayohon Mo ang igsoon namong babaye ug himoon siyang mamaayo na, sa Ngalan ni Jesus Cristo. Amen. Panalanginan ka sa Dios, igsoon.

325 Mianhi ka ba nga nagatoo, igsoon?

326 Minahal nga Langitnong Amahan, ginapangamuyo ko ang Imong mga panalangin para sa among igsoong babaye, nga ginatuman lang kung unsay Imong gisulti nga pagabuhaton. Miingon Ka, “Kini nga mga ilhanan maganunot kanila nga nagatoo. Kung pandongan nila sa ilang mga kamot ang mga masakiton,” miingon Ka nga, “mangaayo sila.”

327 Mohunong usà ko dinhi sa makadiyut lang, aron isulti kini, aron makapahulay lang ang mga tawo sa makadiyut, sa makadiyut lang. Usa ka kritiko kaniadto ang miingon, kanako, nga dili kono ingon-niana kini. Apan, nakita n’yo, miingon baya ang Dios, “Kini nga mga ilhanan maganunot.”

328 Nadungog n’yo na siguro ang akong Mensahe mahitungod sa *Ang Pagbista*, nga gipahimutang si Jesus diha sa usa ka pagbista. Kita n’yo, giingnan Niya si Noe, “Magaulan.” Wala man nag-ulan sulod sa usa ka gatus ug baynte ka tuig, apan nag-ulan ra gyud gihapon. Giingnan Niya usab si Abraham nga makabaton kini og usa ka anak pinaagi ni Sarah. Baynte-singko ka tuig pa human niadto. Wala Siya miingon kung kanus-a. Giingon ra Niya nga makabaton sila og anak. Baynte-singko ka tuig human niadto, nahitabo gyud. Kita n’yo, wala lang Niya giingon kung kanus-a.

329 Miingon Siya, “Ang pag-ampo nga inubana’g pagtoo magaaayo sa masakiton. Pagabangonon sila sa Dios. Kung pandongan nila og mga kamot ang mga masakiton, mangaayo sila.” Mao ba kana ang Iyang giingon? [Nagaingon ang kongregasyon, “Amen.”—Ed.] Wala Siya miingon nga manglukso sila ug buhaton dayon kini. Ang ingon Niya, “Mangaayo sila.” Kita n’yo, mao kana ang Iyang saad. Mao kana ang atong ginatooan.

330 Duol ka, igsoon. Nagatoo ka ba nga tinuod kana? [Nagaingon ang igsoong babaye, “Oo, nagatoo ko.”—Ed.] Kung ingon-ana wala gyu’y makababag kanimo aron ma-ayo.

331 Ginapandong ko ang akong mga kamot sa igsoong babaye, sa Ngalan ni Jesus Cristo, alang sa iyang kaayohan. Amen.

332 Nagatoo ka ba, igsoon? [Nagaingon ang igsoong babaye, “Oo.”—Ed.] Gisugid na ba ang tanang mga sala, ug andam ka na ba?

333 Minahal nga Dios, ginapandong ko ang akong mga kamot sa igsoong babaye, ingon nga pagtuman sa Imong sugo, ug nagapangamuyo para sa iyang kaayohan, sa Ngalan ni Jesus. Amen.

334 Gusto ko nga kamong mga naiampo na, gusto kong buhaton n’yo ang usa ka pabor para kanako. Gusto kong ipahayag ninyo, sa dili pa ang pagtapos niining mga panagtigum, kung unsay magakahitabo; ug tugoti ang mga mananambong, ang ubang mga tawo, nga mahibalo kung unsa gayu’y magakahitabo. Tingali ugma, sa sunod adlaw, o kung kanus-a man, basta matikdi lang ninyo kung unsay mahitabo.

335 Ginapakita sa mga nagsulat kanako nga lahi—lahi gayud kung pasagdan mo ra silang sulayan, sulayan ang ila mismong pagtoo. Tungod kay, miingon si Jesus, “Pandongan nila sila og mga kamot. Pandongan nila sila og mga kamot, mangaayo sila.” Karon sabta ninyo kung unsay Iyang giingon. Wala Siya miingon nga manglukso sila ug mosaka-kanaug sa entablado. Mahimo man nila kana. Apan ang ingon Niya, “Mangaayo sila.” Mao ba kana ang Iyang giingon? Mao kana’y Iyang giingon. Mao kana’y akong ginatooan. Ug ania Siya karon, ang Mao’y nagsulti nga ania ang Pulong aron himoon nga mamaingon-niana kini.

336 Nagatoo ka ba, sir? [Nagaingon ang igsoong lalaki, “Amen.”—Ed.]

337 Minahal nga Langitnong Amahan, tungod sa pagpahayag niya sa iyang pagtoo ug nagatoo, ginapandong ko ang akong mga kamot diha kaniya, sa Ngalan ni Jesus Cristo, alang sa iyang kaayohan.

338 Minahal nga Dios, ginapandong ko ang akong mga kamot sa niining babaye, sa Ngalan ni Jesus Cristo, alang sa iyang kaayohan. Sige.

339 Minahal nga Amahan, ginapandong ko ang akong mga kamot sa niining babaye, sa Ngalan ni Jesus Cristo, alang sa iyang kaayohan. Miingon Ka nga, “Maayo siya.”

340 Andam ka na ba alang sa pagkaayo, igsoon?

341 Minahal nga Dios, ginapandong ko ang akong mga kamot diha sa igsoon babaye, sa Ngalan ni Jesus Cristo, nga ayohon Mo siya.

342 Bueno, igsoong babaye, pinangga, nahiandam na ba ang tanan alang sa pagkaayo? Natagbo na ang imong pagtoo karon, nagatoo ka ba nga mamaayo ka na?

343 Ug, Dios, ginapandong ko ang akong mga kamot diha kaniya, ingon sa pagtuman sa Imong sugo, “Ngadto sa tibuok kalibutan, sa tanang binuhat.” Ginapandong ko ang akong mga kamot diha kaniya, sa Ngalan ni Jesus, alang sa iyang kaayohan.

344 Minahal nga Dios, ginapandong ko ang akong mga kamot diha sa igsoon kong lalaki, sa Ngalan ni Jesus Cristo, alang sa iyang kaayohan.

345 Minahal nga Dios, ginapandong ko ang akong mga kamot diha sa igsoon kong babaye, sa Ngalan ni Jesus Cristo, alang sa iyang kaayohan.

346 [Blangko nga bahin sa teyp—Ed.]...nga nagalakaw sa pasilyo. Ayaw ko gayud nga mabalaka ka. Ma-okey ra ka kung toohan mo kana karon.

347 Minahal nga Dios, nagaampo ko nga ayohon Mo ang igsoon kong babaye, sa Ngalan ni Jesus Cristo. Amen.

348 [Blangko nga bahin sa teyp—Ed.]...aron tabangan ako nga mag-ampo para niining mga tawo.

349 Karon aduna kita og pipila ka mga panyo dinhi, ug uban pa, dinhi, aron maiampo. Ug gusto ko nga padayon kamong magaampo uban kanako karon, ha, sa niining gagmay'ng mga panapton, karon. Kahibalo ko nga daw sa lahi kaayo kini para sa mga tawo ang mag-ampo para sa usa ka gamay'ng butang nga sama niini. Apan kung makaadto lang mo sa akong opisina, usahay, ug tan-awa lang ninyo. Kung gitigum pa nato ang mga testimonyo hangtud niining mga tuiga, siguro dili na ninyo mapatong-patong ang mga niini sa entablado, mahitungod sa mga nangaayo pinaagi ra sa pagpadala niining mga prayer cloth nga sama niini, minilyon na kanila, sa tibuok kalibutan. Karon, kahibalo ba mo kung unsa kini—kini?

350 Duna ba'y puedeng mokuha nianang panyo diha para niana—nianang batan-ong. . . Kahibalo man ka sa imong panyo, dili ba, igsoon? Sige.

351 Ug nakakita ko og luoy'ng, bakul nga mga bata nga nangaayo na. Ug nakita n'yo, kung unsa kini, usa ra kini ka pagpakigkontak, sumala sa ginaingon ni Oral Roberts kaniadto.

Usa ra kini ka pagpakigkontak. Nagaampo kita. Karon, wala nato ginabuhat kini sa atong mga kaugalingon lamang, ginabuhat nato kini tungod kay nagsugo man kanato ang Biblia nga buhaton kini. Nasayod kitang tanan nga tinuod kana.

³⁵² Karon, daghang mga tawo nga ginadihogan nila ang mga panyo, ug uban pa. Bueno, karon, siguro okey ra man kana, oo, pero kung ato lang. . . Wala man miingon ang Biblia nga “nagadihog” sila og mga panyo.

³⁵³ “Kondili mikuha sila gikan sa lawas ni Pablo og mga panyo.” Karon nasabtan ba ninyo kung unsay akong ginahisgotan? Karon, nakita nila kaniadto, kanang gahum nga nagahatag og kinabuhi nga atua kang Pablo, ingon nga hingsayran nila nga siya’y alagad sa Dios. Nasayod man sila nga ang Dios anaa kaniya. Nasayod sila nga ang tanan-tanan nga nahikap ni Pablo gipanalanginan. Pila man ang nakasabot niana? Moingon, “Amen.” [Nagaingon ang kongregasyon, “Amen.”—Ed.]

³⁵⁴ Abi ninyo, nagahunahuna ko nga nagasubay gyud sa Kasulatan si Pablo sa kung unsay iyang gibuhat kaniadto. Wala ba ninyo mahunahuna kana? Gusto ba ninyong isulti ko kaninyo kon asa kaha niya nakuha ang ideya sa pagbuhat niini? [Adunay nagaingon, “Kang Eliseo.”—Ed.] Kang Eliseo, husto. Kita n’yo, miingon si Elias, “Dad-a kining sungkod ug lakaw ipatong kini sa maong bata.” Ug gipadala sa maong propeta ang sungkod tungod kay nasayod man siya nga ang tanan nga nahikap niya gipanalanginan. Nasayod siya sa iyang katungdanan. Siya. . . kung mapatoo niya lang unta ang maong babaye sa mao mismong butang.

³⁵⁵ Karon kita n’yo, karon, wala gyud miingon ang Biblia, “Iampo nila ang mga masakiton.” Ang giingon Niini, “Pandongan nila og mga kamot ang mga masakiton.”

³⁵⁶ Karon palandongang ninyo, nga nakita sa mga tawo, diha kang apostol Pedro, ang Presensiya sa Dios nga napadayag sa niini nga tawo, nga tungod niini ilang—ilang gipahimutang ang mga tawo diha sa iyang landong, ug nangaayo sila. Pila ang nakahibalo nga nakasubay kana sa Kasulatan? [Nagaingon ang kongregasyon, “Amen.”—Ed.] Ingon kana ka subay sa Kasulatan sama sa Juan 3:16. Kita n’yo, Kining tanan Pulong sa Dios. Karon, ang mga tawo, kabalo na mo nga ang landong niadto nga tawo dili man mao ang nagpaayo sa mga tawo.

³⁵⁷ Apan, tan-awa, ang gahum sa Dios anaa gyud niadtong propeta, tungod sa daghang mga katuigan human nga namatay na siya, bisan ang usa ka patay na nga tawo nga gibalibag ibabaw sa iyang lawas, ibabaw sa iyang mga bukog. Wala na gani og unod; bukog na lang ang atua didto. Pero atua man ang Presensiya sa Dios niadtong mga bukog, mao nga nabuhi gayud kadtong patay na nga tawo.

358 Karon wala ba mo mahibalo nga kanang mao ra nga Dios nga mihimo sa tanan niadto nga mga butang ania mismo karong gabhiona? Para—para kanako, siguro kita dapat ang pinakamalipayong mga tawo sa tibuok kalibutan. Hunahunaa lang ninyo kana.

359 Ako—nagalaum ko nga wala ko unta nahimo ang mga mananambong nga maghunahuna nga butang kini nga ginabuhat ko para sa akong kaugalingon. Kamo—mas nahibalo pa man kamo niana. Ako, igsoon ninyo ako, kita n'yo, ug igsoon n'yo lang ako.

360 Apan nasayod ko, nasayod gyud ko niini, nga ania mismo ang Dios. Ug nasayod ko nga gihatagan Niya kita og usa ka butang, nga dili nato maisaysay, og pinaagi lamang sa Pulong sa Dios, nga nagapamahayag kita nga siguradong ania kini dinhi niining higayona. Busa, nagahatag usab kini kanato og ilhanan aron masayran nga nagapuyo na kita sa kaulahiang mga adlaw. Nagahatag kini kanato og ilhanan nga masayran nga kini nga mga tawo, kining mga pinili, gipili, tinawag-pagawas, mga gipili-nang-daan . . .

361 Karon, usa kana ka halangdon nga pulong, *pagpili-nang-daan*, apan nasayod kita nga kamatuoran kini. Bug-os gyud natong nahibaloan nga gipili-nang-daan sa walay-kinutoban nga Dios ang tanang mga butang pinaagi sa Iyang pagkahibalo-nang-daan sa wala pa ang pagkatukod sa kalibutan, bisan ang Cordero nga gipatay; ug ang matag ngalan nga maanaa sa Basahon, anaa na diha sa Basahon sa wala pa man nahisulat ang Basahon. Karon pila man ang nasayod nga tinuod kana? [Nagaingon ang kongregasyon, "Amen."—Ed.]

362 Ug mianhi si Jesus aron—aron luwason kadtong mga anaa sa maong Basahon. Sumala sa Biblia, migula ang Cordero gikan sa luyo sa tabil, ug gikuha ang Basahon ug giablihan ang Mga Selyo nga nagaselyo Niini, kay mianhi man Siya aron angkonon ang tanan nga Iyang gitubos. Siya karon ang Tigpangaliya, usa ka Tigpangaliya nga nagapangaliya alang niadtong Iyang mga gitubos. Ang tanan nga nahisulat na ang ngalan diha sa Basahon sa Kinabuhi sa Cordero, gitubos.

363 Sama sa gihimo kong medyo salikwaut nga pamahayag sa miaging gabii . . . Nagahulat na lang ko para sa . . . tanan niining mga panyo dinhi. Wala ko'y tuyo niadto nga magwali pag-usab, pero ang ingon ko nga aduna lang ko'y gamay'ng pamahayag . . . Nagalaum ko nga dili unta kini medyo mapasipad-on, kita n'yo. Apan sama sa mag-uuma nga gipalumlom ang himongaan, nga wala pa'y igong mga itlog, busa mikuha siya og usa ka itlog sa agila, ug gipalumloman niya kini sa maong himongaan ug napiso kini nga usa ka agila. Ug pagka-salikwaut niini taliwala sa tanang mga manok, tungod dili man pareho ang tan-aw nila sa mga butang. Apan mao lang kadto ang nakita sa agila, ang

himongaan. Usa lamang ka tingog ang madungog niya, dili pa gyud pareho sa iyang tingog. Dili usab siya makatingog nga sama sa himongaan og sa mga manok. Wala pud siya giganahan sa ilang pagkaon, tungod nagakaon ra man ang mga niini diha sa nataran. Aduna gyu'y sa kung unsang butang nga lahi kaniya, apan wala siya kahibalo kung unsa man kana nga kalahian.

³⁶⁴ Ug dayon usa niana ka adlaw, atua ang inahang agila nga nasayod gyud nga nakapangitlog siya og ingon ka daghan nga mga itlog. Ug usa niadto sa mga itlog, nga nahimo na untang piso niya, ang nawala. Busa milupad siya og gipangita kini, ug nakaplagan niya kini diha sa nataran. Ug misinggit siya. Ug sa pagsinggit niya, naila mismo sa gamay'ng agila ang tingog sa maong inahan. Maingon sa gisulti ni Jesus, “Ang Akong mga karnero nakaila sa Akong Tingog.”

³⁶⁵ Nakahunahuna ko, kagabii, sa dihang nakita ko kadtong grupo sa mga Baptists, Presbyterian, ug unsa pa man, nga sila tingali napiso pud ilalum sa usa ka himongaan. Pasayloa ko, igsoon, kita n'yo. Apan nasayod gyud ang Inahan nga aduna Siya'y Iyang mga pinangga dinha sa kung asa man. Busa kanang mga kalalaken-an nga anaa dinha, nga wala lang nagreklamo bahin sa pagkaon nga nadawat nila gikan sa inahang manok, ug uban pa, apan karon mga agila man diay sila, nakita n'yo, manglupad na sila para sa ilang pagkaon. Kita n'yo?

³⁶⁶ Ug sa hunahuna ko ang iglesia mora og sama lang sa usa ka esena nga akong nakita dili pa lang dugay, sa nagabiyahе ako gikan sa Tucson, o gikan—gikan sa Phoenix, paingon sa Tucson. Nakita ko ang usa ka kahibulongan nga talan-awon. Ug medyo nagpasubo kadto sa akong kasingkasing, nga makita ang nahitabo, kung unsa nga . . . ang usa ka banog, nga nagalupad kaniadto sa kahanginan, ingon nga usa ka igsoon sa agila, nga mao'y tipo sa iglesia.

³⁶⁷ Ug si Jehovah mao ang Agila. Gitawag Niya ang Iyang mga propeta nga “mga agila.” Gitawag pud Niya ang Iyang Kaugalingon, Jehovah, “Agila.”

³⁶⁸ Apan dugay nang giwala niining banog ang pagkaila sa iyang kaugalingon, tungod kay wala na man kini nagalupad sa kahanginan aron mangita sa pagkaon niini nga sama sa ginahimo niini unta. Apan nagatugdon na lang kini sa mga kabli sa telepono ug nagalihok nga sama sa usa ka nagakaon og mga patay na. Siya—nagapangita na lang kini og patay na nga mga rabbit nga naligisan sa mga sakyanan, ug siya ug ang mga buitre mangadto didto ug magkauban nga mangaon. Nagalukso siya nga sama na lang sa usa ka buitre, imbis nga magkinabuhi unta maingon sa kung unsa siya dapat magkinabuhi. Nawala na kaniya ang iyang ilhanan.

³⁶⁹ Ug ginasulti ko kini nga may bug-os nga diosnong paghigugma ug pagtahud, nga dugay nang giwala sa iglesia ang

ilhanan niini ingon nga usa ka igsoon sa agila. Nagalingkod-lingkod na lang siya. Imbis nga mangaykay unta diha sa Pulong ug hibaloon kon husto ba kining mga butanga, nagahulat ra siya sa usa ka hugpong sa pang-Sunday school nga mga literatura nga hinimo sa usa ka pundok sa mga intelektuwal sa kung asa man, usa ka patay na nga rabbit nga napatay sa kung asa man. Nagalukso na lang nga sama sa buitire! Tabangan unta kita sa Dios nga makalupad pahilayo niana.

³⁷⁰ Tinuod kini nga mga saad. Dili sa kung unsa ma'y gisulti ni kinsa man mahitungod Niini, kondili sa kung unsa gayud ang gisulti sa Dios mahitungod niini! Tinuod ang mga niini. Malipayon kaayo ko nga nahimong kauban sa mga agila.

Magkauban kitang mag-ampo para sa atong mga may sakit nga igsoon.

³⁷¹ Minahal nga Langitnong Amahan, gikatudlo kini diha sa Biblia nga mikuha sila gikan sa lawas ni Pablo, og mga panyo ug mga panapton, ug migula ang mga demonyo gikan sa mga tawo, ug mibiya kanila ang mahugaw'ng mga espiritu. Karon, Amahan, samtang nagatindog ako dinhi atubangan niining mga panyo, nga nagarepresentar sa matag tawo nga ania mismo dinhi. Kini Lawas ni Cristo, kami nga nagkatigum. Ginapamahayag namo, pinaagi sa grasya ug gugma, nga ania kami aron irepresentar ang Iyang Pangasaw-onon, ug nagatoo, nga mga kauban Niya diha sa Iyang Ginghamarian. Ug nasayod kami nga dili kami si San Pablo, apan nasayod kami nga Ikaw mao gihapon si Jesus.

³⁷² Ug ginaampo namo nga pasidunggan Mo ang pagtoo sa niining mga tawo. Kung nagkinabuhi man sila kaniadto sa mga adlaw ni Pablo, siguradong nadungog gihapon nila kining mao ra nga Maayong Balita, nakita kining mao gihapong mga butang. Busa, sila ang mao ra sa gihapon nga matang sa mga tawo. Ikaw ang mao ra sa gihapon nga Dios. Busa ginaampo ko, Minahal nga Dios, nga pasidunggan Mo ang ilang pagtoo, sama sa gibuhat Mo sa kaniadtong mga adlaw sa Biblia. Ug hinaut nga ang tanang gahum sa demonyo, ang tanang balatian, ang tanang pag-antus, nga naggapos sa mga tawo nga girepresentar dinhi niining mga panyo ug gagmay'ng mga panapton, hinaut nga kanang dautang gahum sa balatian magabiya na kanila.

³⁷³ Gikasulti kini, usa ka higayon kaniadto, nga nagalakaw ang Israel diha sa linya sa pangatungdanan, paingon sa usa ka yutang saad. Ug didto mismo sa linya sa pangatungdanan, miabot ang kaaway ug gitanggong sila, ug mibabag kanila ang Dagat Nga Mapula sa ilang linya sa pangatungdanan, ug sa ilang pagmartsa. Ug midungaw ang Dios gikan sa kalangitan, pinaagi sa Haligi nga Kalayo, ug nahadlok ang dagat. Nangalukot ang mga balod niini, tungod kay atua man ang mga balod sa Dios sa

kinahiladman sa dagat. Ug mihimo Kadto og dalan para sa Iyang mga anak, nga nagalakaw sa linya sa pagtuman.

³⁷⁴ Karon, Dios, kung nahadlok man ang Dagat Nga Mapula, ug gilukot ang mga balod niini, gilukot ang mga tubig niini, ug naghatag og lugar para sa nagapanaw nga mga anak nga nagamartsa lamang sa pagtuman; Minahal nga Dios, karong gabhiona, pagdungaw usab pinaagi sa Dugo sa Imong Anak, nga si Jesus, Nga naghimo sa saad. Ug sa diha nga kining mga panyo maipatong na diha sa mga masakitong lawas sa mga tawo, hinaut nga tan-awon unta sa mga mata sa Dios, ug hinaut nga kanang balatian, kanang yawa, mahadlok gayud ug mobiya. Ug hinaut nga magpadayon ang maong mga tawo sa pagpanaw paingon sa Yutang saad, nga may maayong panglawas ug kusog. Maingon nga nagmartsa ang Israel kaniadto didto sa kamingawan, wala gyu'y usa ka tawong maluyahon sa taliwala nila, bisan sa pagtabok na nila sa pikas. Hinaut nga igatugot kini para niining mga tawo, Amahan, kay ginapadala namo kini nga mga panyo, sa Ngalan ni Jesus Cristo. Amen.

³⁷⁵ Panalanginan kamo sa Dios, ang matag usa. Samtang pagakuhaon na ninyo ang inyong mga panyo karon, magtoo kamo sa tibuok ninyong kasingkasing. Nagatoo ba kamo nga nagapatalinghug ang Dios niini? [Nagaingon ang kongregasyon, "Amen."—Ed.] Kita n'yo? Ako, gusto kong isulti kini. Ayaw, ayaw gyud pagduhaduha, ni diyutay. Kita n'yo, bisan medyo pagkatalagsaon niini. Pasayloa ko, sa makadiyut lang. Ayaw mo pagduhaduha, ni diyutay. Kondili magtoo karon nga, kung unsa ma'y atong gihangyo, ginahatag gyud sa Dios.

³⁷⁶ Nagatoo ba kamo nga ania ang Dios, nga nasayod sa tinago sa inyong kasingkasing? Nasayod ba kamo ug nagatoo nga ang Dios kana? [Nagaingon ang kongregasyon, "Amen."—Ed.] Karon hapsaya lang ang inyong hunahuna karon, nga dili kini mamahimong uban pa. Kita n'yo?

³⁷⁷ Karon, kung aduna ma'y halangdon nga ugma, sa daghang mga tuig nga magalabay mamahimo na lang kini nga kasaysayan. Ug sa diha nga ang mga tawo, sa umalabot nga mga tuig, kung mamaingon niana man kini, mangduol sila ug moingon, "Bueno, kung nabuhi pa unta ako niadtong panahona, makita ko pud unta ang pagkahitabo niana, aba, mao lang kana ang kinahanglan kong masayran. Siguradong gitooan ko gyud kini unta dayon!" Kita n'yo, gitooan n'yo kini sa gihapon, kung atua kamo didto sa dihang gibuhat Niya ang ingon-niini kaniadto! Hinumdumi, nga Siya kini sa gihapon. Ang Iya kining Kinabuhi nga anaa diha kaninyo. Panalanginan kamo sa Dios.



ANG PAGPAMATUOD SA IYANG PULONG CEB65-0426

(Proving His Word)

Kining Mensahe ni Igsoong William Marrion Branham, unang giwali sa Ingles niadtong Lunes sa gabii, Abril 26, 1965, para sa konbensyon sa Full Gospel Business Men's Fellowship International didto sa Embassy Hotel sa Los Angeles, California, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apod-apod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org